

潛研堂金石文跋尾

潛研堂金石文跋尾卷第四

嘉定錢大昕

唐

憫忠寺寶塔頌

至德二載十一月

右憫忠寺寶塔頌憫忠寺今改名法源寺予在京師公事之暇輒與二三同志往遊摩訶斯碑誦其文略能上口前後有數十字類磨去重刻朱錫鬯謂碑建于思明未降唐之先降附以後命靈芝改書其說精而核矣末題至德二載至德字載字皆磨去重刻而舊文尙隱隱可辨至似元是聖字載似元是年字攷祿山以天寶十五載僭號明年歲在丁酉故頌文云歲作噩其題年月必稱聖武二年矣頌爲范陽府功曹叅軍兼節度掌書記張不矜撰不云范陽郡而云府者蓋祿山僭號之後改郡爲府爾蘇靈芝署銜云承奉郎守經略軍曹參軍按唐書地理

志幽州城內有經略軍百官志諸軍各置使一人軍皆有倉兵
胄三曹參軍事故經略軍得置胄曹也

緡雲縣城隍廟記 乾元二年八月

右緡雲縣城隍廟記城隍之神不見于古左傳祝宗用馬于四
鄆又云禘于四鄆杜預以爲圉城也城隍之有祀也其濫觴于
斯乎北史慕容儼鎮郢城城中先有神祠一所俗號城隍神隋
書五行志梁武陵王紀祭城隍神將烹牛忽有赤蛇繞牛口祀
城隍神始見于此至唐而益盛故張說有祭城隍之文杜子美
詩有賽城隍之句然猶不列于祀典少溫記文可證也歐陽公
跋云今天下皆有而縣則少是宋之城隍祠又盛于唐而縣猶
不皆有祠明洪武初從禮臣之請加以封爵京都城隍曰昇福
王府曰威靈公州曰靈佑侯縣曰顯佑伯未幾詔去封爵

祇稱某處城隍之神京都歲遣太常寺堂上官行禮諸府州縣則守令主之而祀典通于天下矣碑在宋時已斷裂宣和五年十月縉雲縣令吳延年丞史良翰主簿費季文尉周明重勒石贈太子賓客白道生碑 永泰元年三月

右左武衛大將軍贈太子賓客白公神道碑朝議郎行尚書禮部員外郎翰林學士賜緋魚袋于益奉勅撰正議大夫行將作少監翰林待詔上柱國賜紫金魚袋摯宗奉勅書道生系出突厥爲寧朔州刺史終于左衛大將軍以子元光貴贈太子賓客史但云寧朔州刺史而已碑題左武衛大將軍而文稱左衛大將軍殊不可解碑始著于京兆金石錄歐趙諸家俱未載予於京師琉璃廠市上購得之文尙完好無大漫漶而書法亦道整可喜乾隆三十年正月陪祀 祈年殿禮成還寓舍書

光祿卿王訓墓誌

大歷二年

右光祿卿王訓墓誌前祕書監嗣澤王漣撰并書訓字訓光祿卿駙馬都尉同皎之孫駙馬都尉繇之子由尚輦奉御四轉至光祿卿娶嗣紀王鐵城女後尚博平郡主而唐書王同皎傳不載其名同皎贈太子少保繇官特進太子詹事贈太傅亦史所未及也史稱相州安陽人而碑云琅邪臨沂人者舉其族望爾宗室表嗣紀王澄初名鐵誠當從碑作城爲是

張禪師墓誌

大歷三年二月

右唐故張禪師墓誌文稱香山禪師諱義琬字思靖俗姓董氏賜諡大演禪師而題作張禪師殊不可解其稱可徒尚書左僕射朔方大使相國郭公者汾陽王子儀也唐以侍中中書令尚書令爲宰相而無相國之名此碑蓋沿流俗所稱以子儀嘗兼

中書令故也

廣平文貞公宋璟碑

大歷七年九月

右開府儀同三司行尚書右丞相上柱國贈太尉廣平文貞公
神道碑舊唐書本紀開元二十一年十一月尚書右丞相宋璟
以年老請致仕許之碑稱開元廿一年抗疏告老正與舊紀合
而新舊書本傳俱作二十年誤矣唐以黃門監卽侍中紫微令卽中書及同三品平章事爲眞宰相開元元年改尚書左右僕射爲
左右丞相雖名丞相而非宰相之職文貞以開元八年由侍中
拜開府儀同三司始罷政事十七年拜尚書右丞相非再入政
府也

碑側記

右碑側記別載逸事二條又云昭義軍節度觀察使尚書左僕

射兼御史大夫平陽郡王薛公嵩慕公德業乃命屯田郎中權
邢州刺史封演購石俾工刻之舊唐書薛嵩傳不稱御史大夫
平陽郡王者略之也封演天寶末進士所著有聞見記古今年
號錄

妬神頌
大歷十一年五月

右妬神頌元和郡縣志云妬女祠在廣陽縣東北九十里澤發
水源又云澤發水亦名妬女泉源出縣東北董卓壘東其泉初
出大如車輪水色青碧泉傍有祠土人祀之婦人袷服靚妝必
興雨電故曰妬女卽此神也碑云妬祠之水澹爲黛色所謂水
色青碧者也後題大歷十一年歲次丙辰五月丁亥朔十六日
壬寅建朱錫鬯跋以爲十三年者因碑石微損而誤讀爾碑云
河東節度副大使兼工部尙書太原尹北京留守薛公兼訓兼

訓以大歷五年鎮太原十一年冬以病去鮑防代之碑立於是年五月兼訓猶在鎮也碑在今平定州之娘子關唐時嘗置承天軍于此亦史所未及

同朔方節度副使王履清碑 大歷十二年二月

右碑題云唐故同朔方節度副使金紫光祿大夫試太常卿兼慈州刺史其下半已亡失矣其文有云府君諱履清字履清京兆萬年人也王惟聖後系出田宗而銘詞稱有媯之後言育于姜陳宗不守命氏惟王知其人姓王氏也葬在高陵之奉正原撰文者侯冕也歐趙諸家皆未著於錄

解慧寺三門樓讚 大歷十二年六月

右解慧寺三門樓讚朝請郎行棗城縣主簿李宥撰周羸金書寺名解慧而金石錄作慧解蓋轉寫之訛漢書韋賢傳黃金滿

簾如淳注簾竹器說文簾與簾互相訓而無簾字廣韻簾字注
兼采說文簾義又云亦作簾則簾簾簾三字皆可通矣簾金署
名本不從竹近人刻金石錄者輒改爲簾字雖若于義無害然
人名不宜用假借字由未見石刻而以臆決之爾碑書稽顙之
稽爲啓忉利天之忉爲刀皆假借也

易州刺史張公山亭再葺記

建中二年

右碑題云光祿大夫試太子賓客使持節易州諸軍事兼易州
刺史充高陽軍使兼御史中丞符陽郡王張公再葺池亭記而
額云山亭所未詳也孝忠爲太子賓客符陽郡王與本傳合舊
史以符陽爲范陽誤矣碑云戊午歲公之來也又云公剖符于
茲逮今三祀而末云歲在作噩月會鶉火則立碑在建中二年
辛酉也

魏文侯師段干木廟銘

貞元元年八月

右魏文侯師段干木廟銘前河南府伊陽縣主簿盧士牟撰陝州靈寶縣令趙彤書碑後題曰州芮城縣令崔□等姓名唐時芮城隸陝州州上蓋缺陝字金元以來縣改隸解州矣士牟官至和州刺史見唐書宰相世系表

姜嫄公劉廟碑

貞元九年四月

右姜嫄公劉廟碑碑爲邠寧節度使張獻甫勅立新廟而作獻甫封朗寧郡王新舊史俱失載李氏自言出於伯陽而伯陽爲庭堅之裔故天寶初尊咎繇爲德明皇帝此碑叙三代承禹稷契之祚而咎繇積累在天天命乃歸於唐蓋以此也都元敬金薤琳琅嘗載其文石今已損失三十餘字前兩行空處攙入明人范文光題名

上柱國梁思基誌

貞元九年十月

右梁府君墓誌今在平遙縣府君諱思字恭蓋以一字字者敘述先世有云竦因才著異以榮稱梁氏之可稱者多矣如異之凶惡而猶亟稱之世俗之重富貴而輕道德殊可嗤也云屬荒郊有事大國用師公奮不顧身掃清邊鄙特蒙累功加上柱國錦衣綵服宗族爲榮殆以助邊餉賜秩者歟云卜麟鳳福慶之穴得雞犬鳴吠之辰蓋堪輿日者之說儒者所不道也

河東鹽池靈慶公神祠碑

貞元十三年八月

右河東鹽池靈慶公神祠碑唐書叛臣傳大歷中淫雨壞河中鹽池味苦惡韓滉判度支慮減常賦妄言池生瑞鹽王德之美祥代宗疑不然命將鎮馳驛按視鎮內欲結滉故實其事表置祠房號池曰寶應靈慶云又地理志安邑縣有鹽池與解爲兩

淹大歷十二年生乳鹽賜名寶應慶靈池以傳及此碑證之則志作慶靈者誤也舊唐書德宗紀貞元十二年九月戶部尚書判度支裴延齡卒碑云十一年秋九月薨未詳孰是碑爲鹽池官吏所建宜不誤矣

彭王傳徐浩碑

貞元十五年十一月

右彭王傳會稽郡公徐浩碑亡其下截每行止存三十九字其文河南少尹張式撰書石者據金石錄爲浩之次子現字畫道動猶能步趨家法碑稱其歷官甚詳其爲太子校書集賢殿待詔改鞏縣尉拜右拾遺又授河南府司錄代宗時再兼集賢殿學士皆史所未載傳稱越州人碑云東海鄒人者舉其族望也又核肅宗子彭王儼薨於肅宗朝子鎮爲常山郡王無嗣王彭者憲宗子彭王惕受封在大中六年距浩卒已久唯高祖子彭

王元則之曾孫嗣王志曠或其時尚存而季海爲其傳手

劍州長史李廣業碑 貞元二十年十一月

右唐劍州長史李廣業碑唐書宗室傳鄭孝王亮仕隋爲海州刺史宗室世系表則云趙興郡守此碑與傳合碑云神堯皇帝贈亮司空又稱神通爲海州牧皆新舊史所失載也廣業父璵表稱左衛將軍而碑稱雲麾將軍亦當以碑爲正

楚金禪師碑 貞元二十一年七月

右楚金禪師碑楚金天寶初建多寶塔置法華道場乾元二年卒中使臨弔勅驃騎大將軍朱光暉監護貞元十三年以中官竇文瑒奏勅追諡大圓禪師文瑒官左街功德使開府鄆國公新舊書本傳所未載也唐自貞元四年罷崇元館大學士後復置左右街功德使東都功德使修功德使摠僧尼之籍及功役

大率以中官爲之其見于史者吐突承璀仇士良田令孜楊復恭見於石刻者竇文瑒梁守謙楊承和皆是也唯復恭稱左後右街功德使後題貞元廿一年七月廿五日是歲爲順宗永貞元年以八月改元故碑猶稱貞元也云七歲諷花經十八講花義謂法華經也
褚耀卽熠耀真縱卽真蹤也

龍泉記

元和三年

右龍泉記鄉貢進士張鑄述河東裴少微書裴勣書額今在芮城縣平定王孝廉執信爲其縣教諭以予好金石刻乃拓一通以遺予其文爲邑令于公疏泉而作後題時順宗傳位之明年涼風至旬有五日記元和戊子月在高藜十八日書涼風至者孟秋之月也高藜未詳其義或云爾雅五月爲皋釋文皋或作高疑是仲夏之月姑存之以俟知者記文雖未工而書特佳顧

自來搜金石文字者皆未著于錄乃嘆物之顯晦有時而嗜古好事者之難得不獨今人爲然也

內侍李輔光墓誌

元和十年四月

右內侍李輔光墓誌尙書刑部員外郎崔元略撰史稱元略爲京兆尹收貸錢万七千緡爲御史劾奏詔三司雜治元略素事宦人崔潭峻頗左右之獄具削兼秩而已此誌云元略從事中郎素飽內侍之德其暱于宦者可知誌稱太原帥李自良薨于鎮監軍使王定遠爲亂兵所害甲士十萬露刃相向公馳命安撫下車乃定便充監軍使前後三易節制軍府宴如十五年閒去猶始至李自良卒於貞元十一年三易節制謂李說鄭儋嚴綬也通鑑河東節度使嚴綬在鎮九年軍政補署一出監軍李輔光綬拱手而已裴垪具奏其狀請以李鄴代之事在元和四

年自貞元十一年至此正十五年矣然則輔光之去河東亦在元和四年而是年復除河中監軍也輔光以監軍兼絳州銅冶使絳州銅冶置使亦史所未載也云自元和四年至九年元戎四換以史考之蓋王錡張茂昭張宏靖趙宗儒也

安定郡王李光進碑

元和十五年

右李光進碑門下侍郎中書門下平章事令狐楚撰光進以元和十年六月卒于鎮十一年二月還葬太原府東四十里孝敬原十三年春弟光顏平淮西入朝請于天子得立碑于墓朱錫鬯云光顏請于朝葬其兄者蓋考之未詳耳碑無建立年月攷宰相表令狐楚以元和十四年七月守中書侍郎同中書門下平章事十五年閏月爲門下侍郎七月罷以楚署銜驗之當在十五年無疑潘次耕題作元和十一年亦誤也傳云年六十五

而碑作五十七當以碑爲正光進字耀卿封安定郡王光顏封武威郡開國公皆傳所未載其稱李自良爲朗寧王亦未見于史也文云蔡邕撰有道之碑自知無愧范文觀武子之墓可以與歸范文當爲趙文之誤又云贈工部尚書李奉國晉公之伯姊奉國者本傳所云舍利葛旃也

贈太保李良臣碑

長慶二年

右李良臣碑雞田李氏墓在今榆次縣之趙村良臣及其子光進光顏三碑具在唐書宰相世系表載雞田李氏世系甚略今據是碑良臣祖賀之貞觀初率部落來歸授爲雞田州刺史充定襄軍使

光進碑作雞田州都督充靈武豐州定襄兵馬使

父延豐嗣襲雞田州刺史

以功加開府儀同三司良臣襲刺史安祿山反肅宗立靈武良臣率所部馳詣行在戰有功拜開府儀同三司雞田州刺史充

朔方先鋒左助兵馬使遷御史中丞寶應二年堯元和中追贈
太保生三子長日光琬朔方都將次日光進次日光顏又光進
碑云嗣子季元河東衙前兵馬使檢校太子賓客兼監察御史
次繼元陳許節度押衙檢校太子賓客兼監察御史次毅元次
綬元太原府太原縣尉次宗元次吉元光顏碑云嗣子昌元鄜
坊丹延節度使檢校戶部尚書兼御史大夫次扶元左龍武軍
大將軍兼御史中丞次繼元行太常寺主簿次誠元湖州司馬
兼監察御史次建元河東節度右都押衙檢校國子祭酒兼殿
中侍御史次興元衢王友兼監察御史次榮元右羽林軍統軍
檢校左散騎常侍兼御史大夫次奉元太原府清源縣丞次播
元河東節度押衙左門槍兵馬使兼監察御史次安元右軍先
鋒兵馬使檢校右驍衛將軍李氏自賀之以下世襲刺史光進

光顏諸子並有位於朝未已叙其世系不應闕如蓋歐公未見此三碑故也

邠國公功德銘

長慶二年十二月

右邠國公功德銘右神策軍護軍中尉梁守謙於大興唐寺花嚴院寫經律戒論五千三百廿七卷立經堂三間堂內造轉輪經藏一所既成副使右監門衛將軍楊承和爲文而書之承和一閭人耳安能工於文辭且書法精妙乃爾殆當時文士游中官之門者爲之假手也守謙以元和十三年充右軍中尉至太和元年三月始致仕以王守澄代之蓋典禁軍者十年故穆宗文宗之立皆預定策功唐書宦官傳劉克明弑敬宗樞密使王守澄楊承和中尉梁守謙魏從簡與宰相裴度共迎江王發左右神策及六軍飛龍兵討之承和事見于史者惟此爾碑以尺

晏爲尺鴛菊葵爲芻葵皆異文

次嵩高靈勝詩 太和三年六月

右尉遲汾詩題云府尹王侍郎率制拜猷因狀嵩高靈勝寄呈
三十韻王侍郎者王璠以吏部侍郎爲河南尹也汾有自注引
白武通云云卽白虎通避唐諱改之也韓文公與祠部陸員外
書云有沈杞者張苴者尉遲汾者李紳者張後餘者李翊者或
文或行皆出羣之材也汾遂以貞元十八年登進士第其文章
雖不多見此五言詩排算頗近昌黎真書規撫虞永興尤精妙
昌黎亟賞之不虛矣宋熙寧丁巳季春大梁王紳被詔禱雨嶽
祠得是石于圯墻下移置祠壁間

東郡懷古詩 太和四年六月

右李德裕東郡懷古詩二篇德裕時爲義成軍節度使治滑州

州故東郡也王京兆尊守東郡河決障禦有功陽給事璣爲宋
寧遠司馬守滑臺城陷不屈死皆官東郡有名者故德裕各爲
詩懷之唐書本傳太和三年出爲鄆滑節度使義成軍管鄆滑
二州史或舉州名或稱軍號如鎮冀稱成德易定稱義武之類
皆是也

龍泉記

太和六年七月

右龍泉記芮城縣令賜緋魚袋鄭澤撰姚全書後列陝號羣牧
使登仕郎行內侍省掖庭局官教博士袁孝和羣牧使判官張
植諸人陝號之有羣牧使使之下又有判官皆唐書百官志所
未載也唐制三品以上紫五品以上緋賞緋紫必兼魚袋謂之
章服上縣令秩從六品而有緋魚之賜可謂殊數矣石刻在芮

寂照和上碑 太和七年十二月

右寂照和上碑文云將化之夕異香滿風體可折支桮孟子爲長者折枝趙氏注云折枝案摩折手節解罷枝也碑以支爲枝用孟子語寂照俗姓龐氏京兆興平人父銓灌鍾府折衝灌鍾府蓋亦雍州百三十一府之一而史之所佚也寂照卒于太和七年十二月其刻銘之年月不可攷金石文字記題云開成六年正月攷文宗以開成五年正月崩武宗卽位其明年改元會昌安得云開成六年乎蓋顧氏記憶之誤也

義陽郡王苻璘碑

金石錄云題中書侍郎同平章事李宗閔撰宗閔太和七年爲此官

右義陽郡王苻璘碑璘父令奇兄唐書忠義傳碑所述與史多同璘兄弟三人同降弟琳檢校太子賓客琅琊郡公瑤忻州別駕琅琊縣男史皆失書其名令奇加贈左僕射璘加贈刑部尙

書史亦失書璘子澈累官鄆寧河東節度使檢校兵部尚書位
甚顯而本傳不書何也

東川節度使馮宿碑

開成二年五月

右東川節度使馮宿碑唐制諸王拜節度大使者皆爾京師以
副大使知節度事者寔正節度也碑稱充劍南東川節度副大
使知節度事而新舊史但稱節度使者蓋以此舊史本傳云韓
愈論佛骨時宰疑宿草疏出爲歙州刺史新史疑其未必然而
刪之然碑云公爲比部郎中爲持權者所忌會韓文公愈上疏
切諫佛骨忌公者誣公寔爲之出刺歙州則固有此事矣昌黎
之文自後世論之固非宿所能及在當時則猶夫人爾況出于
忌者之口亦何所不至哉史稱婺州東陽人而碑云冀州長樂
人蓋舉其族望然唐時冀州固無長樂縣劉知幾所譏諒哉

大遍覺法師元奘塔銘

開成四年五月

右大遍覺法師奘公塔銘稱曾祖爲會父潘昂霄金石例所未聞也碑云麟德元年卒春秋六十九而舊唐書本傳稱顯慶六年卒時年五十六者蓋誤傳載永徽三年春三月造甄塔七級事其下卽云冬十月中官方姬請法師加祐旣誕神光滿院則中宗孝和皇帝也請號爲佛光王受三歸服袈裟度七人請法師爲王剃髮按中宗以顯慶元年十一月生若永徽三年則其時武氏未爲后不得云中宮矣碑蓋失書其生之年爾

太尉李光顏碑

開成五年

右李光顏碑李程撰文甚簡略其序云相國晉公書公盛績永誌元堂琬琰之詞傳于衆口故今之甄述得以略焉蓋有裴君之誌詳之則碑文可以從簡古人作文不相蹈襲雖它人之文

亦必回避如此碑云年六十五而傳作六十六蓋誤據碑文與本傳光顏未嘗帥橫海軍而宰相表云長慶四年橫海節度使李光顏守司徒亦誤

周公祠靈泉碑

大中二年十一月

右周公祠靈泉碑蘇東坡云周公廟在岐山西北七八里廟後百許步有泉依山湧冽異常國史所謂潤德泉世亂則竭者也其名潤德者大中初因崔瑛之奏而賜名也碑首題鳳翔府岐山縣鳳栖鄉周公祠靈泉口井口奏狀及勅批答次列崔瑛奏靈泉狀次中書門下奏賜名潤德泉勅次答崔瑛手詔次瑛謝表末題大中二年十一月廿日鳳翔隴州節度觀察處置等使銀青光祿大夫檢校尚書右僕射兼鳳翔尹御史大夫安平郡開國公食邑二千戶臣崔瑛狀奏瑛爲鳳翔節度使而中書門

下奏內但稱觀察使者節度之職雖視觀察爲重然非軍旅之事陳奏止稱觀察唐人章奏之式多如此也

勅內莊宅使牒

大中五年正月

右勅內莊宅使牒一通牒尾列銜者曰判官內僕局丞彭□曰副使內府局令賜緋□□行宣曰使兼鴻臚禮賓等使特進知□□田紹宗攷唐書百官志內府局令正八品下內僕局丞正九品下皆屬內侍省而內莊宅使之名則百官志無之蓋唐自中葉以後內侍用事所設曹局錄多史家不能悉載宋史職官志唐設內諸司使悉擬尙書省如京倉部也莊宅屯田也皇城司門也禮賓主客也雖名品可效而事任不同

王旦然宋語

以如京莊宅爲武臣叙遷之銜與唐制又異矣牒後述僧正言出錢剋造堂內綵畫兩壁修贖經藏諸事凡九行大中五年正

月十五日記金石文字記以爲六年四月者誤也此文刻于大達法師塔碑之陰正言卽大達之弟子也碑銘柳誠懸書久行于世而碑陰椎拓者少予屬西安莊吉士少彭購得之

襄州別駕韓昶墓誌

大中九年十二月

石襄州別駕韓昶自爲墓誌銘昶小字符昌黎文公之子公有符讀書城南詩注公集者意其爲昶而不敢質言由未見此誌爾云六七歲出言成文不同他人所爲張籍奇之及年十一二樊宗師大奇之宗師文體與常人不同昶讀慕之一旦爲文宗師大奇其文字或出于經史之外樊讀不能通稍長愛進士及第見進士所爲之文與樊不同遂改體就之欲中其彙年至二十五及第昶之以文學自負如此而當時乃有金根之誚好言之失其實自昔然矣昔陶元亮有自祭之文而舊唐書載嚴

提之日爲墓誌非昶所叙也其云大中九年六月三日寢疾八日卒于任其年十二月十五日葬孟州河陽縣疑是後人增入不然昶既自知其死之日又預卜其葬之日亦誕矣宰相世系表昶子惟綰昶二人誌稱有男五人曰緯綰綰綺統攷字書綰與昶同音漢書多有書袞職爲綰職者則綰卽昶也其三人表未及載當據此補之

修曲阜縣文宣王廟記

咸通十年九月
云十一年三月

金石文字記

右修曲阜縣文宣王廟記孔溫裕者戮之第四子於宣尼爲三十九代孫鎮鄆日差人賁私錢就兗州修廟溫裕申奏於朝詔書褒獎而幕僚賁防爲文記之石又附中書門下牒于後牒尾當列省官名押此獨無之石刻不具也唐制節度觀察不並置故節度常兼觀察處置等使舊唐書懿宗紀咸通六年正月制

以河東節度使檢校刑部尚書孔溫裕爲鄆州刺史天平軍節

度鄆曹漢

今刊本誤作棣

觀察處置等使此表及牒止稱鄆曹漢等州

觀察使不稱節度者奏請之事觀察所司故也本傳稱溫裕仕爲天平節度使以節度爲重故也記云皇帝御寓之十年歲在己丑魯國公節鎮汝陽之三載則溫裕之鎮鄆當在咸通八年而舊史云六年恐誤

左拾遺孔紆墓誌

咸通十五年

右左拾遺孔紆墓誌殿中侍御史鄭仁表撰并書紆曾祖岑父贈司空祖弼贈司徒父溫裕檢校右僕射兼太常卿充翰林侍講學士贈司空皆史所未載紆字持卿而宰相世系表作特卿刻本之訛也紆嘗爲左拾遺有子小字鐵婢表亦不載紆未沒前月餘書二十八字於東扆上若隱語者曰許下無言奪少年

震而不雨月當弦風濤渭逆餘艘沒從此無舟濟大川及死人
乃悟蓋許無言是午字震不雨是辰字紆病亟以辰日死以上
弦日而歲則在甲午也唐人小說未有及此事者故聊出之
宗以咸通十四年七月卽位至明年十一月始改元乾符故咸
通得有十五年也

北嶽廟李克用題名

中和五年三月

右河東節度使李克用題名在曲陽縣嶽廟沈存中筆談載其
文云太原河東節度使李克用親領步騎五十萬問罪幽陵回
師自飛狐路卽歸雁門雖槩括其詞然以石刻校之殊未盡合
蓋存中記憶偶誤爾唐書沙陀傳尤啓元年卽中和五年幽州李
舉鎮州王景崇言易定故燕趙境請取分之於是可舉攻易州
下之景崇攻無極易定節度使王處存請救于克用克用自將

救無極敗鎮人攻馬頭固新城鎮兵走處存復取易州此克用
題名卽自將救處存時也克用以二月廿一日與處存同禱獄
廟至三月十七日以幽州請和班師復謁廟饗謝然則克用之
破鎮兵當在二月之末三月之初矣通鑑于是年三月書克用
遣將康君立救處存又于五月書克用自將救無極敗成德兵
皆未得其真沙陀傳稱進檢校太傅而此作檢校太保亦當以
石刻爲正

憫忠寺重藏舍利記

景福元年十二月

右重藏舍利記右街內講殿論兼應制大德沙門南敘述僧知
常書景福元年十二月十八日記碑云隴西令公大王者朱錫
邕以爲李匡威以子攷之匡威之立在光啓二年八月歲在丙
午而碑稱中和二年歲在壬寅值火災延憫忠寺樓臺俱燼又

云不莽年隴西令公大王舍修造觀音閣則造閣之時匡威尙未建節所云令公者當是李可舉耳唐書藩鎮傳載可舉所授官甚略其稱令公而封王爵史未之及也可舉以光啓元年乙巳被殺李全忠代之明年全忠卒子匡威爲留後距壬寅已四年餘矣不當云未莽年也碑于大唐文宗及武皇及宣宗及上皆空二格其云旌麾清河公者張仲武也亦空二格書之獨于隴西令公跳行書之當時河朔之俗知有節使不知有天子久矣其云大燕者沿安史之僭稱也

王審知德政碑

天祐三年閏十二月

右碑題云大唐威武軍節度福建管内觀察處置三司發運等使特進檢校太保同中書門下平章事使持節都督福州諸軍事兼福州刺史上柱國琅琊郡王食邑四千戶食實封壹伯戶

王審知德政碑銘末題天祐三年丙寅歲閏十二月一日准勅
建立改舊唐書哀帝紀天祐三年閏十二月己酉朔福建百姓
僧道諸儒請爲節度使王審知立德政碑從之卽此碑也五代
史開世家乾寧四年潮卒審知代立而碑云乾寧三年僕射遘
疾且付公以戎旅仍具表奏尋加刑部尙書威武軍留後俄授
金紫光祿大夫右僕射本軍節度使則審知代立在乾寧三年
矣而舊唐書昭帝紀乾寧四年四月就加福建節度使王潮檢
校尙書右僕射蓋誤以審知爲潮也方鎮表乾寧四年升福建
都團練觀察處置使爲威武節度使似乾寧以前尙無節度之
名然碑稱福建節度使陳巖又稱巖在軍病甚不能視事潮以
郡委于仲弟審邦而與公偕赴因詔授節度使則福建之置節
度已久惟威武軍之號則於乾寧中始賜耳唐書稱威武軍而

五代史職方考及閩世家俱作武威者謬也碑又有佛齊國雖
同臨照靡襲冠裳公示以中孚致其內附云云按舊唐書天祐
元年六月三佛齊國入朝使蒲訶粟可寧遠將軍以碑證之蓋
由審知招撫之力矣

法門寺塔廟記

天祐十九年二月

右碑題大唐秦王重修法門寺塔廟記天祐十九年二月守尙
書禮部郎中薛昌序撰文云秦王者李茂貞也金石文字記据
通鑑後唐同光二年封岐王李茂貞爲秦王此文在同光之前
以爲必茂貞所自稱以予攷之殊不然舊唐書昭帝本紀景福
二年十一月制以鳳翔節度使李茂貞守中書令進封秦王蓋
茂貞之稱秦王自此始茂貞自岐王封秦王故云進封其後天
復三年除茂貞檢校太師守中書令史仍稱秦王不云岐王也

通鑑同光二年進岐王僞爲秦王考異云茂貞改封秦王薛史無的確年月實錄同光元年已稱秦王茂貞遣使賀收復自後皆稱秦王至二年辛巳制秦王李茂貞可封秦王豈有秦王封秦王之理必是至是時始自岐王封秦王也据此則莊宗實錄本書秦王溫公以意改之耳茂貞唐之舊藩與河東均附屬籍稱兄弟行至是始稱臣於莊宗故因其舊封授之錫以冊命實錄所載本不誤通鑑改之失其實矣五代史茂貞傳書封岐王于昭宗幸華之後通鑑則書于天復元年不知茂貞封岐王乃在景福元年以前舊唐書景福元年以岐王李茂貞爲興元尹山南西道節度等使傳又稱梁祖卽位茂貞稱岐王開府置官屬又稱茂貞聞莊宗入洛乃上表稱臣遣其子入朝改封秦王詔書不名不知茂貞在昭宗之世稱秦王已久矣岐者一州之名秦者大國之號茂貞已受命

建國曰秦必不含秦而仍稱岐此夫人而能知者也通鑑稱唐之亡也惟河東鳳翔淮南稱天祐西川稱天復年號此碑敘述前事俱用天復紀年至二十年止碑末乃書天祐十九年與史不合五季土宇瓜分各帝其國紀元之令朝更暮改史家得于傳聞不若碑碣之可信當全忠叔昭宗遷洛改元天祐河東西川謂天祐非唐號不可稱仍稱天復岐介晉蜀之間與梁爲深讎必仍以天復紀年及唐既亡河東改稱天祐西川仍稱天復茂貞與西川爲鄰亦必仍稱天復也久之晉日盛強滅梁之形已久茂貞乃改稱天祐以自同于晉此事之想當然者惜乎史文缺漏賴有此碑立于當日可證紀元之異同此金石文字之有功于史學也寺在鳳翔之岐山縣唐憲宗元和十三年功德使上言鳳翔法門寺有護國真身塔塔內有釋迦牟尼佛指骨

一節上遣中使帥僧衆迎之者卽此塔也

號國公楊花臺銘

無年月

右號國公楊花臺銘文稱輔國大將軍號國公楊等皆天子貴臣忠義盡節號國公楊者內侍楊思勗也書姓不書名蓋碑之變例顧氏金石文字記以爲號國公主則大誤矣文爲亳州臨渙縣尉申屠液撰唐志亳州無臨渙縣亦史之闕也文有序無銘而題云花臺銘并序末云乃爲銘曰豈別有銘詞刻于它石而今失之乎

後梁

崇福侯廟記

開平二年

右碑題重修墜廟兼奏進封崇福侯記而額稱崇福侯廟之記顯寧人朱錫恩但稱爲鎮東軍墜廟記者未見其額也記

文吳越王鏐撰前十行後八行字大徑寸中列勅文六行字大徑二寸許此式他碑所未見羅玉嘗守越州旣沒州人祀以爲城隍神至是請于朝而得封號勅文云頃因剖竹之辰實有披榛之績敕修府署綬輯吏民此其行事之略也玉之名唐書附見四世孫堅傳云嘗爲越州都督非總管又云爲領軍武衛二大將軍召爲監門大將軍不云右衛皆與碑文小異未知孰是碑末武肅署銜云啓聖匡運同德功臣云守侍中亦五代史所未載也

佛頂尊勝陀羅尼幢

貞明三年十一月

右佛頂尊勝陀羅尼及大悲心陀羅尼石幢幢八面其一面刻榮陽鄒義造幢記後題貞明三年歲次丁丑十一月壬子朔二十六日辛丑貞明後梁均王年號攷溫公通鑑目錄是歲十一

月丙子朔日辛丑逆數至丙子恰二十六日乃知以丙子爲壬子書碑者之誤也其云武寧軍親王者福王友瑋末帝時由忠武軍節度使徙鎮武寧故也義以親王元從官于許下建幢施龍興寺新羅漢堂永爲供養今幢已斷失其下半而書法秀逸可愛乾隆己卯錢塘周君西隱以戶部主事出知許州拓其文遺予西隱下世又將十年矣感良友之贈恆藏諸笥戊子冬十一月十有三日日南至題

後唐

重修定晉禪院千佛邑碑

天成四年九月

右磁州武安縣定晉山重修古定晉禪院千佛邑碑天成四年九月九日建沙門崇仁撰文有云金枝黃鉞掌鉅號之山河帝子親王乘邢臺之旌節攷五代史唐明宗家人傳明宗有姪從

溫嘗爲安國軍節度使封充王當即其人也廣韻一尾部收鍾
字注鉅鍾郡名漢尹宙碑分鍾地爲鉅鍾亦作鍾此字出來古
矣又云東魏黃初三年高歡帝所造黃初乃曹魏紀年而誤以
爲東魏僧流不通古今而妄說故事往往如此千佛邑者合千
人出錢布施之名亦曰千人邑此碑稱邑首都維那三人次維
那十人共稱良闍互相勉導逐處鄉邑次立維那舉其万法之
門結會千人之數當時規立邑會其制大略可見遼金之世諸
寺各立千人邑見於碑刻者未易更俟數讀斯文乃知溫觴于
五代也

賜冥福禪院地土牒

長興四年九月

右碑額云特賜冥福禪院地土之記首行云勒中書門下宣賜
冥福禪院產業地土次十四行字較小叙地土四至分十段末

行云古付冥福禪院准此此八字與首行大小相等下書長興四年九月二十三日牒月日之上鈐以中書門下印後兩行字又大于首行曰樞密使檢校太傅平章事駙馬都尉趙曰樞密使檢校太傅平章事范皆姓而不名以史攷之蓋趙延壽范延光也官職同而次行樞密字獨高二格者延光先入樞密故也兩人皆有押押上各用一印顧氏金石文字記謂此牒無押者視之未審爾又後兩行曰樞密使檢校太傅平章事范封曰中書門下牒冥福禪院亦用印鈐于字縫凡五處此非牒文乃牒外之封識獨以班首一人列銜當時文書之式略可見矣方是時馮道李愚劉昫官同中書門下平章事乃眞宰相之職延光延壽特以樞密使加平章事耳此牒出于中書門下面押行者惟趙范二人道等皆不與蓋五代之際政由樞密其居相位者

無過頑鈍伴食之流朝政不由己出雖尋常文書亦不復關白
名爲宰輔定同庶僚李愚所謂吾君延訪鮮及吾輩者是也上
既不以匡弼相期而下亦不以廉恥自立世徒譏馮道視喪君
亡國未嘗以屑意詎知道在相位固未嘗一日得行其志也哉
五代史范延光傳遼史趙延壽傳俱不云爲檢校太傅平章事
略之也牒署九月二十三日又明日延壽罷樞密至十月延光
亦去二人方握政柄故愚家難之作而乞出鎮以避之如馮道
輩雖在政府絕不奉行文書何避之有然千載而下非見此牒
烏能知當時情事石刻之有裨于知人論世如此碑之下方刻
奉符縣公牒一道後題阜昌三年二月某日給蓋偽齊劉豫年
號也前云據崇法院主僧海巖後云右給公據付崇法禪院收
執照會准此蓋冥福院時已改名崇法矣後列知縣事劉主簿

高尉張三人皆有押字而不名前後鈐奉符縣印凡三方書法視後唐牒文較劣而錯勒如出一手蓋賜牒後又二百年而始勒之石也冥福寺今在秦安縣城內

後晉

吳越文穆王神道碑

天福八年四月

右吳越文穆王神道碑前半剝裂幾無一字惟首行題大晉故天下兵馬都元帥守尚書十三字尙存字特大徑三寸餘較于正文幾大三倍它碑無此式也後半文字可讀者十之七八而銘詞獨完好吳任臣嘗采其詞入十國春秋矣十國春秋載文穆王十四子碑文雖缺以次第推之大略多同宏伯爲文穆養子時已得罪故碑不及也最後一人其名不可辨而下云爲國披縑法號□悟蓋卽宏信十國春秋失載其法號耳碑文備列

中朝奉使之臣以十國春秋校之頗多抵牾碑稱戶部侍郎張
文寶吏部郎中張絢爲守中書令使十國春秋則以絢爲封吳
王使文寶爲宣諭使碑稱甲午歲給事中張延兵部員外郎馬
義爲冊封吳王使乙未歲右常侍孔昭序駕部員外郎張□爲
冊封越王使十國春秋則以孔昭序等奉使在甲午正月張延
雍碑無雍字等奉使在甲午六月俱稱冊吳越王碑稱刑部尙書李
懌膳部郎中薛鈞充天下兵馬元帥官告使十國春秋則誤以
薛爲崔以膳部爲禮部皆當據碑爲正惟碑書冊使年月較十
國春秋率後一年或數月蓋一書奉命之時一書至杭之日故
有不同也碑稱忠獻王起復鎮軍大將軍十國春秋作鎮國大
將軍亦誤撰文者中書門下平章事和凝立碑年月則天福八
年四月也

冥福禪院新寫藏經碑

天福八年五月

右東嶽冥福禪院新寫藏經之碑朝議大夫行殿中侍御史周元休撰文駢儷可誦在五代時足稱作者其以覆篋爲覆匱與虞伯施孔子廟堂碑同碑末列銜者十餘人首云興邦佐命忠亮功臣泰寧軍節度充沂密等州觀察處置等使檢校太師同中書門下平章事使持節都督兗州諸軍事行兗州刺史武威郡開國公食邑□□食實封三百戶安審信審信者金全之從子也五代史不爲立傳又未附見于金全傳惟晉本紀天福八年泰寧軍節度使安審信捕蝗于中都卽立碑之年也唐本紀清泰三年先鋒指揮使安審信叛降于石敬瑭通鑑亦云張敬達奏西北先鋒馬軍都指揮使安審信叛奔晉陽此興邦佐命功臣之號所由賜歟五代之際名爵冗濫藩鎮加公師宰相銜

者多矣史家不能悉載王溥會要載晉出帝朝使相二十八人
審信居其一此碑署銜云同中書門下平章事正與會要合其
稱檢校太師則他書所未見也

義成軍節度使駙馬都尉史匡翰碑

天福八年六月

右晉義成軍節度使檢校司徒駙馬都尉贈太保史匡翰碑文
尙完好惟每行之首損去五字匡翰建塘之長子也碑於建字
下空文以避晉諱而建塘父敬思獨不避蓋當時著令止避下
一字也建塘死贈太保其祖懷清任安慶九府都督皆五代史
所不載而敬思爲九府都督亦當有安慶字史省文爾朱錫鬯
云史稱歷鄭州刺史而碑不書按五代史本云鄭州防禦使不
云刺史此朱氏記憶之誤予讀碑文有云圃田待理漢殿掾才
功臣旌佐國之名出守奉專城之寄又云齋壇峻而金鼓嚴

案宣而油輓出控梁苑之西郊殷平威望撫國僑之遠俗綽有政聲蓋匡翰由鄆州防禦使拜義成節度而鄆州元在義成軍管內碑固未嘗不書也陶穀之文排比鋪張頗爲親切而圖光遠書法圓美五季石刻如此者亦罕矣

開化瑤巖閣記

開運二年七月

右蒙山開化瑤巖閣記觀察判官將仕郎檢校尚書戶部郎中兼侍御史賜紫金魚袋蘇禹珪樞觀察支使朝請郎試大理司直兼殿中侍御史蘇曉書兼篆額開化寺者版于北齊在隋爲淨明寺唐高祖始賜今額會昌中寺廢李克用鎮太原復而新之乃建斯閣凡五年而成未幾閣復隳至是河東節度使北平王劉知遠舍俸錢重修禹珪曉皆知遠慕僚故云奉命也碑末列知遠銜與五代史合史不云檢校太師者略也方是時唐之

已久矣碑猶稱唐朝爲皇朝於北齊唐後唐諸帝皆跳行起格書之其書北平王亦跳行起一格蓋其時方鎮之權重而條屬貢諛幾擬於帝制矣五代史本紀天福十二年觀察推官蘇禹珪爲中書侍郎同中書門下平章事不知禹珪前二年已爲判官判官在推官之右也碑後書大元至正八年十月轉華嚴大經僧福敬等重立石前叅議樞密院事內臺監察御史郭彥亨謄書蓋經元人重書故字體較弱亦有譌字如庾作庚之類

後周

衛州刺史郭公屏盜碑

顯德二年五月

右衛州刺史郭公屏盜碑宋史郭進傳云周廣順二年遷登州刺史會羣盜攻叔居民進率鎮兵平之部內清肅民吏千餘人

諸國請立屏盜碑許之顯德初移衛州衛趙那洛開多亡命者以汲郡依山帶河易爲出沒伺間椎剽吏捕之輒逃去故累歲不能絕其黨類進備知其情狀因設計發掘之數月間剪滅無餘郡民又請立碑記其事改洛州團練使有善政郡民復詣闕請立碑頌德詔左拾遺鄭起撰文賜之進先後莅三州三州之民皆請於朝立碑頌德其治行必有過人者此碑乃衛州所立右補闕杜韓奉勅撰文而待詔孫崇望書之者也進是時官止刺史而階至金紫光祿大夫勳至上柱國檢校司徒兼御史大夫封太原縣開國男賜推誠翊戴功臣之號可見五季名爵之濫而史家所不詳者多也

中書侍郎平章事景範碑

顯德三年十二月

中書侍郎同中書門下平章事贈侍中景公神道碑下半已

唐滅顧寧人金石文字記謂剝落者十之一二今距顧氏又百
年十去其五矣碑本行書而顧以爲正書碑首題翰林待詔
朝議郎守尚農寺丞孫崇望奉勅書而顧亦失載其姓名以顧
氏攷證之審且嘗親至碑下猶不免踈漏如此紀載可盡信哉
五代史不爲範立傳惟周本紀書範拜相月日而不書其罷之
月日亦缺漏也

大佛頂陀羅尼幢 顯德五年

右佛說大佛頂陀羅尼石幢後題下元甲子顯德五載龍集戊
午日躔南斗高陽許氏建在虎邱山之劍池五代之際蘇州在
吳越錢氏管內吳越奉周正朔故以顯德紀年實吳越忠懿王
嗣位之十一年也予二十年前寓居吳門徧游伽藍古刹訪唐
以前石刻皆無有此幢建於吳越有國時楷書猶有唐人筆法

雖無書人姓名亦堪寶愛攷王象之輿地碑目未載此幢近人修虎邱志亦遺之虎邱近在郭外游人日肩摩其側莫有過而問者椎拓著錄自予始其書雖爲龔與王居士塔銘蕭思亮墓誌總作纏同

閩

崇妙保聖堅牢塔記

永隆□年

右崇妙保聖堅牢塔記林同穎撰僧无逸書碑文稱王曦尊號爲後人磨去然猶彷彿可辨蓋睿明文廣武聖光德隆道大孝皇帝十四字也通鑑載曦被弑之後諡曰睿文廣武明聖元德隆道大孝皇帝與碑所稱尊號略同惟睿明文廣武聖六字先後互易及以光爲元小異皆當以碑爲正曦以永隆三年稱皇帝卽上此尊號旣沒遂以尊號爲諡其時篡奪相仍諒無暇別

議謹矣通鑑失載曦上尊號一事五代史并諡亦略而不書毋
乃太簡乎題首似有大開二字亦爲後人磨去塔建于永隆三
年十一月至告成之年月上俱空一字未行題年月日亦空其
文蓋撰書之時塔尙未成故空其月日及立石鐫勒後遂不復
補填偏閏之世事多艸艸類如斯也

潛研堂金石文跋尾卷第四

潛研堂金石文跋尾卷第五

嘉定錢大昕

宋

新修周武王廟碑

開寶六年十月

右新修周武王廟碑翰林學士尚書兵部員外郎知制誥盧多遜撰翰林待詔太僕寺丞孫崇望書宋史禮志太祖命李昉盧多遜王祐扈蒙等分撰嶽瀆祠及歷代帝王碑遣翰林待詔孫崇望等分詣諸廟書于石此其一也文稱應天廣運聖文神武明道至德仁孝皇帝攷東都事略載開寶元年八月戊辰羣臣上尊號與此正同宋史本紀聖文作大聖誤史又移上尊號于十一月恐亦誤

新修唐太宗廟碑

開寶六年十月

右新修唐太宗廟碑殿中侍御史分判度支公事李瑩撰亦移

崇聖書宋史太祖紀開寶三年九月詔西京鳳翔雄耀等州周文成康三王秦始皇漢高文景武元成哀七帝後魏孝文西魏文帝後周太祖唐高祖太宗中宗肅宗代宗德順文武宣懿僖昭諸帝凡二十七陵嘗被盜掘者有司備法服常服各一襲具棺槨重塋所在長吏致祭碑云啟舊楚所以極衣冠之飭正指此事也

新修嵩嶽中天王廟碑

開寶六年十二月

右新修嵩嶽中天王廟碑亦盧多遜撰係崇聖書結銜與周武王廟碑同宰輔編年錄開寶六年九月己巳盧多遜叅知政事多遜自翰林學士兵部員外郎遷中書舍人除此與周武王廟碑一立於十月一立於十二月猶稱翰林學士尙書兵部員外郎者撰文時猶未執政也

新修商帝中宗廟碑

開寶七年四月

右新修商帝中宗廟碑右拾遺梁周翰撰翰林待詔太子率更寺主簿司徒儼書其文云案商本紀帝太戊契二十一代之孫帝雍己之弟攷史記契子昭明昭明子相土相土子昌若昌若子曹圉曹圉子冥冥子振振子微微子報丁報丁子報乙報乙子報丙報丙子主壬主壬子主癸主癸子湯湯子太丁外丙中壬太丁子太甲太甲子沃丁太庚小甲雍己太戊太戊實契之十六世孫若兄弟各爲一世則爲二十二世太丁未立故稱二十一世也

重修兗州文宣王廟碑

太平興國八年十月

右重修兗州文宣王廟碑起復翰林學士朝散大夫尙書都官郎中知制誥呂蒙正奉勅撰宋史孔宜傳太平興國八年詔修

曲阜孔子廟宜貢方物爲謝詔褒之卽立碑之年也起復者米
除喪而起視事所謂奪情是也父母之喪法當免官非有詔起
之不得任職故有起復之名後世乃以服闋就官爲起復失其
義矣宋史禮志凡奪情之制文臣諫舍以上牧伯刺史以上皆
卒哭後恩制起復其在切要者不候卒哭內職遭喪但給假而
已願終喪者亦聽惟京朝幕職州縣官皆解官行服亦有特追
出者而大中祥符九年殿中侍御史張廓言京朝官丁父母憂
者多因陳乞與免持服望自後並依典禮三年服滿得赴朝請
則京朝官并有乞免行服者矣居喪奪情古人所譏然唐時名
公卿已多行之宋則侍從以下亦有起復者當時風俗相沿不
以爲怪蘇明允與歐陽內翰書云二子軾轍竟不免丁憂今已
到家然則二蘇當日亦在可起復之例而不果行也五代史匡

翰林碑以起復入銜至宋世益多矣

善才寺觀音院記

淳化元年五月

右善才寺觀音院記宜補鎮遏使陽峻撰梁文素書碑末列名
自陽翟縣令主簿尉而外有內品監許州陽翟縣鹽麴商稅鄭
延遇殿前承旨監許州陽翟縣鹽麴商稅董□供奉官前監許
州陽翟縣鹽麴商稅李繼□三人攷宋史百官志內品乃內臣
叙遷官而東西頭供奉官則武臣叙遷官也殿前承旨之名不
見于史疑卽所謂內殿承制者視供奉官差貴爾然一縣之小
而監當鹽稅者不一其員又以內侍武夫充之民其不堪命乎
陽翟縣今爲禹州隸開封府

徐休復禱先聖文

淳化二年四月

右徐休復禱先聖記休復時爲給事中奉命禱嶽祠還過曲阜

孔子廟設奠而作其文無可取者而彭展分書殊有唐人風度
史稱休復假堊親之名乞知青州到官但殖貨終不言堊事又
以私憾誣人謀反陷之重辟其素行如此而禱于先聖願子子
孫孫長遵乎聖教生生世世不離于儒門何其謬耶夫今生後
代之說儒者固所不道而其所望于子孫習儒者乃出于利祿
之私非真有志于道德也則亦不得謂之義方矣

重修北嶽安天王廟碑

淳化二年八月

右重修北嶽安天王廟碑先時契丹入塞縱火焚嶽廟太宗出
帑儲令有司重新之工成勅王禹偁撰文禹偁時以左司諫知
制誥故也予家藏小畜集有此文以石刻校之當改正者凡十
餘字集本恆山作常山恆文作星文乃是避真宗諱追改者非
誤也碑末列名者忠果雄勇宣力功臣定武軍節度定州管内

觀察處置北平軍等使金紫光祿大夫檢校太保使持節定州諸軍事定州刺史兼御史大夫上柱國兼駐泊馬步軍都部署清河郡開國公食邑四千二百戶食實封陸伯戶張訓按宋制諸州置知州軍事一人無刺史之稱節度使但爲加銜未有授本鎮者此以定武軍節度使持節定州刺史猶沿唐五代之舊蓋沿邊州郡設官與內地異且其時去開國未久或閒有因仍而未革者歟

偏旁字源

咸平二年六月

右篆書目錄偏旁字源五百四十部其建首立爲一端畢終于亥南岳宣義大師夢英所書也以說文校之多一子部少一、部又部序先後閒有小異郭忠恕答英公書云見寄偏旁五百三十九字按說文字源唯有五百四十部子字合收在子部今

攷說文子字卻在了部非在子部亦不可曉碑後題名有推忠
宣力翊戴功臣建武軍節度觀察留後知永興軍府事兼都提
轄永興軍華耀乾商兵甲捉賊公事光祿大夫檢校太傅兼御
史大夫上柱國彭城郡開國公劉知信推誠宣力翊戴功臣鎮
寧軍節度澶州管内觀察處置河堤等使金紫光祿大夫檢校
太傅使持節澶州諸軍事行澶州刺史兼御史大夫知涇州事
兼管界都巡檢使上柱國平陽郡開國公柴禹錫二人宋史柴
禹錫傳至道初制授鎮寧軍節度知涇州入謝日上謂曰由宣
撥罷者不過防禦使爾今委卿旌節兼之重鎮可謂優異矣然
則宋時節鎮雖祇空銜亦未嘗輕以予人也功臣之號惟中書
樞密得賜推忠字知信以庶僚得之蓋殊數也職官志稱京兆
府兼安撫使馬步軍都總管此惟帶都提轄兵甲捉賊公事不

兼安撫蓋官制沿革非一史家不能盡書也

檢校太保廣平郡公程德玄碑

景德二年

右檢校太保廣平郡開國公程公碑御書院祇候王坦書撰文者磨滅失其姓名矣碑所載歷官先後與本傳略同其檢校官由司空司徒至太保封由廣平郡開國男至開國公史皆略而不書其卒在景德元年而以明年歸葬子繼宗右侍禁繼忠右侍禁寄班祇候繼勳繼英繼隆繼明皆右班殿直繼昇三班奉職史惟載繼宗繼忠二人爾史家之例貴乎謹嚴子孫名位不大顯而無言行可述者原可從略然有書有不書則轉難免望漏之譏矣

勅修文宣王廟牒

景德三年二月

右勅修文宣王廟牒其略曰中書門下牒京東轉運司資政殿

大學士尙書兵部侍郎知通達銀臺司兼門下封駁事王欽若
奏諸道州府軍監文宣王廟多是摧塌及其中修葺完葺者被
勾當事官員使臣指射作磨勘司推勘院欲乞特降勅命指揮
令諸道州府軍監文宣王廟摧毀處量破倉庫頭子錢修葺仍
令曉示今後不得占射充磨勘司推勘院及不得令使臣官員
等在廟內居住候勅旨牒奉勅宜令逐路轉運司遍指揮轄下
州軍監依王欽若所奏施行口至准勅故牒景德三年二月十
六日牒牒尾列刑部侍郎叅知政事馮拯尙書左丞叅知政事
王旦二人名致宰相未是歲二月戊戌寇萊公始罷政事寔月
之二十六日也判牒之曰萊公尙在相位而牒無萊公名何邪
欽若立朝不爲君子所許此奏不載于本傳然尊崇先聖之心
亦有可取所當表而出之未可以人廢也

禪社首壇頌 大中祥符元年

右禪社首壇頌王欽若撰其結衍稱天書儀衛副使封禪禮儀
經度制置等使禮部尚書知樞密院事與宋史本傳合其封太
原郡開國公傳所未載也碑文首云汧陽御歲應鍾旅月國家
建號之四十九禪皇帝肇統之十有二載眞宗以至道三年丁
酉卽位至大中祥符元年戊申寔十二歲上距太祖建隆元年
庚申蓋四十九歲矣又云履端之月成魄之辰仰蒼龍之內闕
觀黃素之奇文謂是年正月三日天書降左承天門也又云巍
然岱嶽密邇岷嶽頌綠字之文述蒼元之意謂六月乙未天書
再降于泰山醴泉北也又云升北辰魄寶之座創先蠶壽星之
祭按本傳欽若嘗請置先蠶并壽星祠升天皇北極帝坐於郊
壇第一龕故述其事於碑刻也

祀文宣王廟題名記

大中祥符元年十一月

右祀文宣王廟題名記首云皇宋膺天命之三葉大中祥符紀號之元年封于岱嶽虔成鼎蹕錫宴兗州十有一月朔皇帝躬謁元聖文宣廟特以太牢致祭詔舊相吏部尚書張齊賢攝太尉行禮按真宗紀十一月戊午幸曲阜縣謁文宣王廟褙袍再拜加諡孔子曰元聖文宣王遣官祭以太牢史書曰不書朔闕文也張齊賢傳不載遣祭孔子亦闕文也陪祭者太常少卿陳象輿以下凡十五人以中貴監祀事毋乃瀆神而失禮乎

重刊旌儒廟碑

大中祥符三年五月

右重刊旌儒廟碑按唐書地理志昭應縣有旌儒鄉有廟故坑儒明皇更名碑本唐兵部侍郎賈至撰都官郎中徐珽書在昭應縣西南二里令公谷卽秦坑儒之所也大中祥符初知昭應

縣事張緯以碑年久剝落重書勒石移置城中至聖廟并記其顛末于碑左方宋史地理志臨潼縣唐昭德大中祥符改此碑立于大中祥符三年五月縣名尙未改史以昭應爲昭德傳寫之訛爾碑末知永興軍府張秉結銜云同管勾駐泊兵馬公事兼提轄乾耀商華坊丹同等州巡檢捉賊公事與咸平二年劉知信結銜又異此皆史家所未詳也

中嶽中天崇聖帝碑

大中祥符七年九月

右中嶽中天崇聖帝碑文云皇帝登封岱宗之四年有事于汾陰后土親奠黃玉對越柔祇乃並洪河抵太華經塗溫洛望秩維嵩言旋上都誕受不祉無德不報靡闕不思於是尊五嶽之祠備加等之禮分命近列祇薦徽稱詔遣冊禮使攝太尉右諫議大夫龍圖閣直學士陳彭年副使攝司徒光祿少卿沈繼宗

奉玉書袞章加上中嶽中天崇聖王曰中天崇聖帝申殊典也
又云靈閣之式像設俛存懿號未彰羣黎安仰思慕正名之典
用昭作合之崇象服有加梓衣允穆卽以其年十二月遣使致
告特尊爲貞明后其稱封岱之四年謂大中祥符四年也五嶽
自唐時已加二字王號眞宗東封岱宗加仁聖二字親謁西嶽
加順聖二字中嶽南嶽北嶽史無加號之文然此碑云加上中
天崇聖王曰中天崇聖帝則崇聖二字固已先加此時特易以
帝號耳中嶽后稱貞明而文獻通考宋史禮志俱作正明者蓋
避仁宗嫌名也宋史陳彭年沈繼宗傳不云爲中嶽冊禮使亦
史之略也

北嶽安天元聖帝碑 大中祥符九年四月

右北嶽安天元聖帝碑文云粵以靈文申錫之四年郊邱飲至

之十月詔曰北嶽安天王可增號北嶽安天元聖帝按宋史真
宗紀大中祥符四年五月乙未加主五嶽帝號作奉神述十月
戊申御朝元殿發五嶽冊碑稱十月者據奉冊之日也說文鄉
河東臨汾地卽漢之所祭后土處此云鄉邱依至謂汾陰祀后
土禮成也冊禮之使爲攝太尉尙書工部侍郎馮起攝司徒太
僕少卿葉莊通鑑長編紀事具載東嶽南嶽西嶽中嶽奉冊使
副官職姓名闕遺北嶽當據此以補其闕宋史葉莊傳大中祥
符祀汾陰遷太僕少卿爲北嶽加號冊禮副使撰北行記三卷
以獻卽其事也職官志定州兼安撫使馬步軍都總管碑後列
知定州軍州事劉承宗結銜稱充鎮定等路駐泊兵馬鈐轄蓋
其時定州尙未設安撫司也

教典頌

天禧三年五月

右敘興頌題云虛儀先生撰而不著其名序云日者文表起戎
保權告難北軍爰整南服又曰頌云洞庭漣漣巴陵遷遷億萬
斯年蓋叙宋初平湖南事也宋史文苑傳有馬應者薄有文名
多服道士衣自稱先生開寶初倣元結中興頌作勃興頌以述
太祖下荆湖之功欲刊石于永州結頌之制縣令惡其夸誕不
以閱此頌三句一轉韻與中興頌同格署先生而不名知其爲
馬應所撰也碑後題年月云皇帝嗣明高之三葉歲在未月建
午日丁卯山陽吳玉搢以爲開寶四年辛未予攷開寶四年五
月乙未朔無丁卯日其時宋有天下十二年爾雖三改元不當
云三葉且太祖開創之主不得云嗣明高也碑末書攝太常寺
太祝李夢徵傳本則勒石之時去開寶初已遠矣宋自太祖至
真宗有天下者三世葉者世也云三葉其在真宗之世乎真宗

景德四年丁未五月丙申朔無丁卯日惟天禧三年己未五月丁巳朔丁卯乃月之十一日也故定以爲天禧三年云

增修中嶽中天崇聖帝廟碑

乾興元年六月

右增修中嶽中天崇聖帝廟碑後題乾興元年六月十六日建
按乾興元年二月真宗崩仁宗卽位碑文稱崇文廣武感天尊
道應真佑德欽明上聖仁孝皇帝則真宗天禧三年以前所上
尊號也蓋修廟之役始事于祥符六年癸丑畢功于八年乙卯
知微奉勅撰文亦在此時更數年而後勒之石耳王曾中嶽廟
碑陳彭年北嶽廟碑所書尊號欽明二字在上聖之下宋史東
都事略並同獨此碑欽明在上聖上不可曉

孔道輔祖廟祭文

景祐二年六月

右孔道輔祖廟祭文首云維景祐二年歲次乙亥六月癸丑朔

九日辛酉四十五代孫龍圖閣直學士朝請大夫右諫議大夫知兗州軍府事兼管內勸農使及管勾仙源縣景靈宮太極觀提舉兗鄆樸齊州清平軍兵馬本甲巡檢公事上輕車都尉魯鄧開國侯食邑一千五百戶食實封貳伯戶賜紫金魚袋道輔謹以清酌庶羞之奠敢昭告于祖聖至聖文宣王兗州稱軍府者大中祥符元年升州爲大都督府故也章邱縣景德中官升爲清平軍見宋史地理志祭文首云道輔早持邦憲黜典淮城方數月間遷守徐城攷道輔以明道二年十二月爭廢后事出知秦州其徙徐州蓋在景祐元年故云方數月也又云道輔位爲大夫權任方面嚴父慈母不能歸養因西鄉拜章天從其欲詔守故魯攷本傳止云徙徐州又徙兗州未載道輔乞養事得此可裨史家之闕碑末列名者曰將仕郎前守徐州彭城縣主

簿良輔曰將仕郎守將作監主簿彥輔曰將仕郎守國子監主簿襲封文宣公宗愿曰朝奉郎行太常寺太祝宗亮曰宣德郎行太常寺奉禮郎宗翰曰通奉大夫守祕書監分司南京主管祖廟事上柱國會稽縣開國伯食邑八百戶賜紫金魚袋勅宗翰者道輔之子見本傳良輔彥輔當是諸昆弟宗愿宗亮當是其子行也最爲道輔之父故又別爲一行書字特大尊之不與子姓伍也宗愿襲封文宣公宋史儒林傳失載以東都事略証之疑是孔佑之子矣

狄武襄公神道碑

嘉祐七年十一月

右狄武襄公神道碑翰林學士王珪奉勅撰文三司度支判官宋敏求奉勅書其額則仁宗御書賜之碑文之上方別題御篆賜額四大字它碑所未有也碑文首云至和三年八月以上以樞

密使護國軍節度檢校太尉河中尹天水狄公拜同中書門下平章事出判陳州明年三月感疾于州未幾以薨聞攷宋史本傳嘉祐中罷青爲同中書門下平章事出判陳州明年二月疽發髭卒仁宗以至和三年九月辛卯改元嘉祐青之罷樞密在是年八月故碑猶稱至和也傳當云嘉祐初而云嘉祐中其卒在二年三月而誤云二月皆史家之失也碑叙所歷官與傳小異者傳稱爲泰州刺史碑作泰州傳稱爲保大安遠二軍節度觀察留後碑止書保大軍碑稱青年五十而傳不書亦缺漏也儼知高他書多作智高古字通用

文彥博宿少林寺詩

當在嘉祐間

右宿少林寺詩保平軍節度使同中書門下平章事判大名府兼北京留守司事潞國公文彥博所作保平陝州軍額太平興

國中賜名也。潞公嘉祐三年罷政以河陽三城節度使平章事判河南府後改保平軍節度判大名府詩有西來未悟禪師意北去還馳使者車之句自注予方受命移守北都蓋移守之命已下而未離河南也。宋之盛時大臣進退以禮潞公以故相在外而恩遇不替無憂詭畏譏之心又州郡守臣更代之際登臨山水觴咏如平日蓋上之察吏不苛以簿書期會之細而事亦未嘗叢脞而不治真可謂太平之象矣。

畫錦堂記

治平二年三月

右畫錦堂記文稱大丞相衛國公按韓忠獻於皇祐中封南陽郡開國公嘉祐中入相進封儀國公英宗嗣位改衛國公後又改魏國公碑立于治平二年三月曾稱衛國則魏國之封當在其後宰相表于治平元年閏五月已書魏國公者誤也此記俗

本亦誤作魏蓋後人不知忠獻嘗封衛公而以意改之耳

龍岡阡表

熙寧三年四月

右瀧岡阡表歐陽修撰公自署銜曰推誠保德崇仁翊戴功臣按文獻通考及宋史職官志文武臣僚功臣號無推誠而有推忠然史又稱中書樞密則推忠協謀親王則崇仁佐運餘官則推誠保德翊戴則推忠之號惟兩府專之其餘文武諸臣但當爲推誠耳通考及史文作推忠者誤也歐公嘗任執政此所賜功臣號止稱推誠保德者宋制中書樞密所賜若罷免或出鎮則改之予又記狄武襄公神道碑稱推誠保德守正翊戴功臣狄公由樞密使出鎮故所賜功臣號亦用餘官之例也表作于熙寧三年四月時公以觀文殿學士知青州按宰相編年錄是年四月除宣徽南院使判太原府方作表之時除命尙未下也

鄆州州學新田記

元祐五年九月

右鄆州州學新田記宋史滕甫傳哲宗登位除龍圖閣直學士復知鄆州學生食不給民有爭公田二十年不決者甫曰學無食而以良田飽頑民乎乃請以爲學田遂絕其訟碑云先是汝水之陽東山之下有美田畝一金宜桑柘麻麥官與大豪而薄其賦口根深牢旁小民歲歲訟不解公曰吾學適貧不若盡以與之卽爲奏請得田二千五百畝有奇與民耕之歲輸錢百万是爲新田正與史合記爲尹遷所撰簡質有法度而李伋分書方整古雅甚得漢人筆法宋世言分隸者未能或之先也

穆氏先塋石表

政和三年九月

右穆氏先塋石表其一云有宋君子河南穆君庭秀諱賓熙寧元年二月五日卒穆氏世爲河南人君挈其孥占籍于齊州之

章邱縣歿葬女郎山之陽後四十有五年當政和癸巳九月既望刻石表墓以著不朽其一云章邱有隱居篤行長者河南穆君辛干熙寧丙辰後三十七年孫渙始錄其先人宣德手疏君遺善委洛陽王壽卿以爲墓表君諱端字伯初宣德君諱疊蓋君家嗣云二表皆王壽卿撰并篆書伯初庭秀之子也後有黃山谷跋稱杜元凱左氏之忠臣王魯翁李監之上嗣蓋其傾倒如此穆氏四世皆無他表見徒以王魯翁篆法之妙得藉以不朽世之欲表揚其先而壽之金石者可不擇所托哉

勅賜升元觀牒

政和八年六月

右泰山升元觀牒題政和八年六月十四日攷徽宗以是年十一月改元重和故猶稱政和也後列尙書省長官曰起復太中大夫守左丞王者王黼也曰特進少宰者余深也曰起復少保

太宰者鄉居中也皆有押字曰太師魯國公而不押者蔡京也
前載奉寧軍狀稱兗州奉符縣其右旁書政和八年閏九月
二十一日襲慶府權措置升元知觀事賜紫道士李冲立石
按徽宗紀是年八月乙亥升兗州爲襲慶府故先稱兗州後稱
襲慶府矣陸游老學庵筆記云自唐至本朝中書門下出勅其
勅字皆平正渾厚元豐後勅出尙書省亦然崇寧間蔡京臨平
寺額作險勁體來長而力短省吏始效之相誇尙謂之司空勅
亦曰蔡家勅蓋妖言也京敗言者數其朝京退送及公主改帝
姬之類偶不及蔡家勅故至今勅字蔡體尙在此碑勅字正所
謂蔡體也

御筆付李邦彥詔

政和八年六月
在是年十月

御筆記李邦彥黑

右徽宗御筆付李邦彥詔其略云朕崇經術設學校興賢能以

待天下之士宜有豪傑特立之材忠信志義之士比肩相望煥
耀一時而比年以來懷僭亂之異謀干殊死之賊寇者如趙諒
備侔王案劉昂之徒或賢科異等動閭世胄或出入禁閤侍從
之便偏爲搢紳士大夫之大辱其故何也豈利心勝而義不足
以勸之與抑勸導率勵之方有所未至歟卿當師儒之任以學
行致大官其思所以勸勵興起俾知尊君親上之美無復暴戾
邪僻之行以居德而善俗以化天下與後世稱朕意焉保和殿
直學士蔡脩題其額而李邦彥述記刻於下方書法俱可觀碑
今在濟南府學度當時刻石必不止一處未審它州尙有存者
否宋史本紀及李邦彥傳俱不及此詔邦彥官大司成傳亦失
載語曰其身正不令而行其身不正雖令不從觀徽宗之詔可
謂有志于化民成俗矣而人才日衰國遂以亡何哉蓋徽宗之

所好者道教也其臣如蔡京王黼輩皆姦邪諛佞重以元祐黨
禍之禁上書邪等之分士氣沮抑已甚所立學校三舍法不過
習介甫諸經說便于空疎微俸之流而豪傑特立者固未嘗出
其中也邦彥輕薄浪子領袖師儒乃亟稱其學行此豈真能知
人育才者區區十行手詔欲使天下風移俗易慎矣是故有國
家者務寔而不尚文

錢伯言題名

宣和元年十月

右知徽慶軍府事錢伯言題名在泰安縣東嶽廟伯言宋史無
傳此題有云過青帝觀觀文僖丞相遺刻當亦吳越王之後矣
文僖嘗語人曰吾平生不足者惟不得于黃紙上押字耳言未
入中書也此稱丞相者宋制節度使加中書門下平章事謂之
使相侍中尚書令中書令雖不恆除亦真宰相也文僖生爲使

相沒贈侍中亦得通稱丞相矣

越州城隍廟牒

紹興元年五月

右越州城隍廟勅牒首行尙書省牒越州顯寧廟昭祐公十二大字次三行小字乃太常寺奉聖旨擬定封號申尙書省狀也次六行大字乃尙書省牒文具載勅詞文皆正書惟三牒字二勅字皆草書而勅字獨大後題紹興元年五月日牒鈐以尙書省印後押勅者二人曰叅知政事張而不名曰尙書右僕射同中書門下平章事姓名俱不書以史攷之蓋張守范宗尹也自元豐官制行而平章叅知之名久廢南渡初詔尙書左右僕射並帶同中書門下平章事改門下中書侍郎爲叅知政事而宰輔之名又一變矣碑末一行題少傅鎮潼軍節度使判紹興軍府事兼提舉學事兼管內勸農使充兩浙東路安撫使馬步軍

都總管信安郡王食邑□千二百戶食實封三千四百戶孟忠厚立石忠厚隆祐太后兄子見宋史外戚傳史作鎮海軍節度蓋鎮潼之誤又攷高宗本紀紹興元年十月己丑升越州爲紹興府碑前云越州後云紹興軍府蓋立石在升府之後矣

宣聖及七十二子贊

紹興二十六年十二月

右宣聖及七十二子像贊高宗御製并書其像則李公麀所畫也史記載孔子之言曰受業身通者七十有七人其姓名具于列傳家語所載亦七十七人無公伯僚秦冉鄒單而有琴牢陳亢縣單惟文翁禮殿圖作七十二人而圖亦罕傳林放蓬瑛二人史記家語不載而禮殿圖有之其它不可知矣攷舊唐書禮儀志載開元二十七年制贈公者一人侯九人伯六十七人與史記七十七人之數合然杜氏通典載諸賢封號則贈伯者實

七十二人

文獻通考云通典所載除十哲外自計七十三人係增入范瑋張林放陳亢中振琴半琴張六人核琴半琴

張本一人通典於琴張云贈南陵伯於蓋十哲之外別有七十

琴半但云贈伯而無地名蓋重出也

二賢兼史記家語禮殿圖所互見者而數之也宋大中祥符二

年追封閔子以下九人爲公曾子而下六十二人爲侯并充國

公爲七十二弟子大觀二年追封公夏守等十人侯爵預祀典

則仍別七十二賢于十哲之外矣思陵撰七十二子贊較之祥

符所追封多靡潔秦商后處樂欬少公良孺勾井疆顏何公西

輿如不知又何所據諸賢在宋時已經加封而所書仍唐之爵

號朱文公嘗言之矣夫治國固有緩急思陵偏安兩浙稱臣于

仇讐正復崇儒重道亦何足掩不孝之名則數典而忘祖又在

所不足責而如秦檜之姦耶無學亦豈能援引典故以證人主

之誤哉碑立于紹興二十六年十二月明宣德二年巡按浙江

監察御史吳訥磨去檜跋自爲文識其本末

朱文公書

右朱文公書易有太極一段蔡元定刻在常德府學明正德乙亥吉水鄧璞爲嘉定縣儒學教諭復摹勒于吾邑之尊經閣下今移置明倫堂西南向刻手不精遜原本遠甚海隅士大夫罕見文公書得重刻本猶珍而祕之子在都門琉璃廠書市得此本蓋猶常德元刻筆法險勁精采四射殊可喜也

嘉定縣學記

嘉定二年八月

右嘉定縣學記宣教師知平江府嘉定縣主管勸農公事兼鹽場兵馬監押弓手寨兵軍正沈璞記并書先是嘉定十二年知縣高衍孫叔立學宮落成十餘年璞始爲文記之其文有云異時來學之士將有躡魁躡躋顯仕以光耀其里閭者豈若鄭鄉

校徒議其執政而已哉予嘗誦其言而疑之夫縣之有學將使
人士通經學古致力於聖賢之道以淑其身也立德立功立言
皆吾儒分內之事舍此而以巍科騰仕誇耀里閭有志者羞稱
之先正黃蘊生成進士與其弟書謂傳臚第一人觀者莫
不稱羨士不爲千百年中一人而爲三年中一人識趣卑陋已
甚蘊生之識勝于璞遠矣禮居是邑不非其大夫士君子忠厚
之道固然身爲長吏正當采輿誦以鑑己得失若之何惡之政
而無失何恤乎人言若其有失安能禁人之議堯設謫木而聖
周任衛巫而亾人主尙不可監謫區區令長而惡人之多言可
乎一言以爲不知此之謂夫

潛研堂金石文跋尾卷第六

嘉定錢大昕

遼

白川州佛頂尊勝陀羅尼石幢記

開泰中

興中故城東北六十七里有古城址周不及三里遼白川州地也城中有遼石幢記首云奉爲神贊天輔皇帝齊天彰德皇后萬歲親王公主千秋文武百僚恆居祿位風調雨順海晏河清一切有情同霑利□按聖宗加上尊號凡六曰昭聖者乾亨四年也曰天輔者統和元年也曰至德廣孝昭聖天輔者五年及二十四年也曰宏文宣武尊道至德崇仁廣孝聰睿昭聖神贊天輔者開泰元年也曰睿文英武遵道至德崇仁廣孝功成治定昭聖神贊天輔者太平元年也此云神贊天輔皇帝則石幢之立當在開泰以後矣遼史仁德皇后傳稱統和十九年冊爲

齊天皇后本紀亦同自後別無加上尊號之事史文闕略當據此以補之但不知在何年耳其云親王者大丞相晉國王耶律隆運也記文爲長寧軍節度掌書記儒林郎試大理評事武騎尉王桂撰後有長寧軍節度管內觀察處置等使金紫崇祿大夫檢校大傅使持節白川州諸軍事白川州刺史兼御史大夫上柱國丁巳下俱闕疑書石人名也遼史地理志川州明王安端置會同三年詔爲白川州安端子察割以大逆誅沒入省曰川州不云省于何年金史則云天祿五年去白字今此幢立于聖宗時猶稱白川州可見金史考之未審也左方列銜可辨識者有銀青崇祿大夫兼監察御史武騎尉商稅勑務都監王元泰銀青崇祿大夫兼監察御史武騎尉同監勑務張翼三司押衙勑務判官兼知商稅事翟可行銀青崇祿大夫檢校工部尚

書兼御史大夫上柱國崔辰儒林郎試大理評事守白川州咸
康縣令武騎尉王□銀青崇祿大夫檢校左散騎常侍兼殿中
侍御史驍騎尉江濤觀察判官儒林郎試大理司直雲騎尉賜
緋魚袋田能成管內觀察處置等使金紫崇祿大夫檢校大傅
使持節白川州諸軍事白川州刺史兼御史大夫上柱國鉅鹿
縣開國子食邑五百戶耿延□諸人於史無所表見惟聖宗紀
有昭德軍節度使耿延殺其爲一人與否惜石文斷裂無從知
之矣遼史志百官於南面尤略此所載結銜有散官有檢校官
有憲官有試秩有勳有爵有賜有食邑皆史所未詳至商稅麴
務都監同監麴務及麴務判官之設百官食貨兩志俱遺之所
宜特書以補正史之缺漏也

右釋迦佛舍利塔記興中故城之址有浮圖三焉土人名其地曰三座塔其南塔之前嘗有掘土得地宮一崇八尺廣六尺五寸八面相等周遭嵌碑文其一片云維大契丹國興中府重熙十五年丙戌歲十一月丁丑朔十六日壬辰起手鑄次年四月乙巳朔八日壬子午時葬釋迦佛舍利記凡五十字字大徑二寸餘末載辦塔主僧則覺花鳥海雲寺業律沙門志全也塔徙于天慶二年以釋慧材所撰記攷之塔蓋十三簷藏釋迦佛舍利一千三百餘顆定光佛舍利六百餘顆此惟云釋迦文不備也遼自太宗建國號大遼以後聖宗統和元年復國號曰大契丹道宗咸雍二年復稱大遼遼史俱沒而不書國號之更易事莫大于是尙不盡書其餘之闕漏可勝言哉讀此碑益慨然于文獻之無徵也

惺忠寺觀音菩薩地官舍利函記 大安十年閏四月

右大惺忠寺觀音菩薩地官舍利函記劉氏帝京景物略朱氏
日下舊聞俱曾載之子在京師數遊斯寺問寺僧記所在俱云
無有今春同家詹事載朱學士筠紀太僕復亨曹給事學閔到
寺觀海棠偶見旁院牆腳文斲方石形製有異徹而視之則斯
記也文甚完好後題大安十年歲次甲戌閏四月辛未朔二十
二日壬辰甲時攷遼道宗金東海侯俱以大安紀年東海侯享
國纔三年耳此云大安十年蓋遼之大安而劉氏以爲金刻亦
考之未詳矣予頃遊馬鞍山戒壇寺見遼學士王鼎撰法均碑
師碑後題乾時又石幢二皆遼時刻一題庚時一題坤時渾拓
山有了公禪師塔銘金大定中刻亦題庚時今此記稱甲時蓋
遼金石刻之文多作斯語以甲乙丙丁庚辛壬癸乾坤艮巽代

十二支也庚寅三月二十二日書

安德州勅建靈巖寺碑

右安德州勅建靈巖寺碑朝請大夫守殿中少監知安德州軍
州事耶律劬撰文沙門恆劬正書碑陰記則恆劬撰文而劬篆
書今在興中故城東南七十里柏山之顛字畫完好小篆尤工
不減夢瑛党懷英也文云壽昌初元歲次乙亥枝洪遼泉志有
壽昌元寶錢引李季興東北諸蕃樞要云契丹主天祐年號壽
昌又引北遼通書云天祚卽位壽昌七年改爲乾統今遼史作
壽隆不云壽昌或疑泉志之誤予見遼時石刻稱壽昌者多矣
無有云壽隆者東都事略文獻通考皆宋人之書也亦稱壽昌
其以爲壽隆者遼史之誤也遼人雖于遼諱光祿卿之改崇祿
避太宗諱也改女真爲女直避興宗諱也追稱重熙爲重和避

天祚嫌名也凡石刻道光字皆缺畫或作允此碑亦然道宗者聖宗之孫而以壽隆紀元祀聖宗之諱此理之必無者矣

易州興國寺太子誕聖邑碑 壽昌四年七月

右易州興國寺太子誕聖邑碑沙門方偁撰文范陽逸士張雲書太子誕聖邑者千人邑之名以四月八日誦經禮佛而名之也遼史禮志二月八日爲悉達太子生辰京府及諸州雕木爲像儀仗百戲樂從循城爲樂葉隆禮契丹國志本作四月八日此碑亦以四月八日爲誕聖之辰則禮志所稱誤矣然金史海陵紀有禁二月八日迎佛之文知當時固有以二月爲佛生辰者非後人轉寫之誤也碑末列銜者都維那右監門衛大將軍知易州軍州事兼沿邊巡檢安撫屯田勸農等使耶律遷朝散大夫尙書左司郎中通判軍州事賜紫金魚袋武騎尉楊舉直

朝散大夫尚書比部郎中知易縣事飛騎尉借紫劉琬妻李氏
儒林郎試大理司直守司戶叅軍借緋斬佑臣承務郎試太子
校書郎守司候叅軍雲騎尉李師仲承務郎試太子校書郎守
易縣主簿兼知縣尉宋公綯將仕郎守國子直講官學黃溫仁
儒林郎守太子校書郎雲騎尉知律劉詠軍事判官文林郎試
太子校書郎魯去華都孔目官文林郎試太子校書郎武騎尉
周師安左都押衙李照右都押衙王文信知客石恩副知張存
知衙韓安去撫押司官楊師言印官韓仁詮前行曹拱溫後行
劉世宣州司呈押田湊書表馮詮印官何閏前行孫世卿前行
石恩司候司典曹福本典王恩皆州之官吏也遼史百官志南
面方州官州有刺史縣有令而碑所載知軍州事通判軍州事
知縣事之名史皆失書蓋遼之官制多雜采唐宋之名志以爲

大略采川唐制者猶未甚核故予特標而出之俾後之言官制者有所攷焉

玉石觀音像唱和詩碑

詩昌五年九月

右玉石觀音像詩碑首唱者崇祿大夫檢校太師行鴻臚卿英辨大師賜紫沙門智化和之者兵部尚書兼門下侍郎平章事鄭若愚左僕射兼中書侍郎平章事韓資議兵部尚書興中尹趙庭睦諸行宮都部署尚書左僕射梁援特進禮部尚書叅知政事趙長敬觀書殿學士翰林學士行尚書禮部侍郎知制誥馬元俊中大夫昭文館直學士知御史中丞開國侯劉瓌度支使金紫崇祿大夫行尚書禮部郎史仲愛乾文閣待制史館修撰曲正夫朝請大夫守秘書監開國伯賜紫金魚袋王執中南面統行宮都部署□□尚書吏部員外郎于復先前樞密院

吏房承旨行殿中少監王仲華朝議大夫知制誥開國子孟初
朝散大夫司農少卿知大定少尹賜紫金魚袋張識司農少卿
知度支副使楊滌琬守殿中少監知析津縣事李師範□□□
□□行御史中丞賜紫金魚袋李□□提點弘法守將作監張
□□內藏副都監朝散大夫尙書虞部郎中借紫冠□□殿中
丞直史館張塢左丞制閣門祇候韓汝礪崇祿大夫檢校司徒
辨慧詮正大師賜紫沙門善□凡二十二人書石并篆額者門
人講華嚴經苾芻性照也立碑年月則壽昌五年九月也遼史
韓延徽傳資讓壽隆初拜中書侍郎平章事道宗紀壽隆三年
四月南府宰相趙廷睦出知興中府事九月以梁援爲漢人行
宮都部署碑載三人結銜皆與史合碑有平章事鄭若愚叅知
政事趙長敬而遼史無之惟本紀壽隆元年見叅知政事趙孝

嚴六年見宰相鄭頤官同姓同而名則互異不可解也碑後又有講經法姪性連資講僧性鑒二詩字體疎密與前不相應又侵末行題款字蓋立石以後補刊者

釋迦定光二佛的身舍利塔記

天慶二年

右釋迦定光二佛的身舍利塔記在重熙鐵塔記之旁天慶二年釋慧材撰文作駢體亦琅琅可誦叙重熙十五年鑄鐵塔事以重熙爲重和初疑其誤後讀老學庵筆記有云政和末議改元王黼擬用重和既下詔矣范致虛開白上曰此契丹號也故未幾復改宣和然契丹年名實曰重熙後避天祚嫌名追謂重熙曰重和耳不必避可也乃知改熙爲和實以避諱之故碑文刻于當時果無誤也然此事遼史亦未及之世謂裨官小說無益于史豈其然哉

金

沂州普照寺碑

皇統四年十月

右沂州普照寺碑文云子城之西南有臺巋然山城隅臺之西復有廢池耆舊相傳臺曰曬書池曰澤筆其地蓋晉右將軍王羲之逸少故宅予攷東觀餘論稱逸少以晉穆帝升平五年卒而昔人又稱右軍三十三書蘭亭序右軍年五十有九以永和九年年三十三推之當卒于孝武太元四年二說不同按晉書謝安傳嘗與王羲之登城悠然遐想有高世之志羲之謂曰夏禹勤王手足胼胝文王吁食日不暇給今四郊多壘宜思自效而虛談廢務浮文妨要恐非當今所宜安之得政在寧康太元之際則太元初逸少尙存以爲卒于升平五年者誤矣永嘉之亂琅邪陷于劉石其時逸少尙未生也安得有故宅在琅邪且

有澤筆之池乎碑文集柳誠懸書駸駸欲亂真與懷仁聖教序可謂異曲同工槓字右旁缺筆避金熙宗御諱也

博州廟學記

大定二十一年

右博州廟學記東昌人謂之三絕碑三絕者王去非文王庭筠書党懷英篆額也三人金史俱有傳庭筠之父逾古時爲博州倅以興學自任庭筠此書結束殊有力真可與米顛蘇湖縣學記抗衡而去非作記時年已八十有一耄而能文亦可稱也逾古字元仲好學守道當時稱遼東夫子官至翰林直學士而庭筠傳中祇一見其名未免失之略矣

碑陰記

大定二十一年六月

右廟學碑陰記逾古撰亦庭筠書而筆勢尤縱逸以古文篆題其額者遵古之門人李穀亦不減党承旨筆法也記末自題熊

岳王遶古熊岳縣屬東京路之蓋州故有遶東夫子之稱金史
庭筠傳以爲河東人誤中州集庭筠熊岳人

威顯廟祈雨感應記

明昌三年二月

右威顯廟祈雨感應記廟在河南之新安縣祀隋涼州總管韓
擒虎擒虎蓋其縣人也隋書北史本傳俱未載其謚此記稱韓
莊公不知何據

党懷英四絕句

明昌六年四月

右党懷英書王荊公四絕句今在濟寧州儒學嵌大成門東西
壁閒懷英以篆隸擅名一代此詩用古文篆尤精妙可愛其云
黃菊分香飢路塵蓋借飢爲委字漢書淮南王傳皇帝飢天下
正法揚雄長楊賦飢屬而還師古曰飢古委字張表碑旌命飢
任亦以飢爲委也云臥看蜘蛛紛網絲借紛爲結儀禮士冠禮

將冠者采衣紵注紵結髮古文紵爲結詩毛氏傳象弼所以解
紵疏云紵與結義同碑後題濟州普照禪寺住持傳法嗣祖沙
門智照立石照卒於明昌六年八月其塔銘亦懷英八分書

重修至聖文宣王廟碑

明昌六年

右重修至聖文宣王廟碑金史章宗紀明昌元年三月辛巳詔
修曲阜孔子廟學三年十月壬子有司奏增修曲阜宣聖廟碑
勅党懷英撰碑文卽此碑也文云經始于明昌二年之春踰年
而土木基構成越明年而髹漆采績成先是羣弟子及先儒像
畫于兩廡旣又以捭索易之又明年而衆工皆畢蓋其成之難
如此又云方役之興也有芝生于林城及尼山廟與孔氏家園
凡九本典役者采園以間夫芝之生也以不恆見爲瑞明昌之
際勅尚書省獻靈芝嘉禾者有賞此芝與嘉禾之所以日多歟

孔林之芝不載于五行志蓋當時獻芝者多不能悉書也史稱
承安二年正月特命襲封衍聖公孔元惜世襲兼曲阜令碑藏
于明昌六年賜祭服祭器之前當是明昌五年事此可以證史
之誤

遊百家巖詩

泰和四年三月

右遊百家巖詩題凡六曰嵇康淬劍池曰劉伶醒酒臺曰孫登
長嘯臺曰稠禪師庵曰王烈泉曰明月池各賦一絕句泰和甲
子三月二十有八日承德郎沁南軍節度副使王宏巨卿題修
武校尉守縣令王師韓立石此全金詩所未收也

濟瀆靈應記

正大五年二月

右濟瀆靈應記文云歲在戊子天子以去冬不雨宵旰憂民粵
春王正月遣資政大夫中常侍兼上林署提點官籍監使內侍

局令尙藥局直長高佑銜命降香于濟瀆顯祐清源王天語一
發不決辰而雨者三使車在路雪復盈尺二月抵祠下謹默致
聖意及所賜香酒拜祝于淵德殿尊食紙于海紙直下如掣俄
頃風行波動勢復洶湧有神物出其間狀大數圍俗所謂二將
軍者延頸被紙顯首東南且進且退如舞如蹈凡數四有望闕
謝聖恩意中使高佑敬懼灑酒神筵前飲及數卮悠然而去觀
者如堵以爲聖主之德至誠感神也按金史禮志明昌間封濟
爲清源王此稱顯祐清源王或史有脫文或初封號止二字而
後又加二字俱不可知矣哀宗紀正大五年二月乙巳朔大寒
雷雨雪木之華者盡死卽此記所云使車在路雪復盈尺也當
是時金之國事日棘久旱之後繼以祁寒雨雪民其不堪命矣
而中官奉使者且夸以爲至誠所感帝又有賜銀修廟之役豈

非上下相蒙國將必聽于神之驗乎末題宜差從宜經略使奉
國上將軍知孟州防禦使護軍金源郡開國侯食邑一千戶食
寔封一伯戶僕散桓端建孟州金時置防禦宣宗時又置經略
司故守臣帶從宜經略使入銜也

重修濟瀆廟記

正大五年六月

右重修濟瀆廟記中使高祐祀瀆還奏上靈異特賜銀二萬五
千重修祠廟令孟州防禦使僕散桓端同知納蘭和尚司其事
廟成爲文記之者種竹老人也

元

嶽陽重修朝元觀記

至元二十二年三月

右嶽陽重修朝元觀記翰林集賢學士知制誥同修國史徐世
隆撰記後綴以七言律詩一篇劉惟一書名不甚著而小篆殊

有法度元刻之佳者也文稱東平嚴公者嚴實之子忠濟也南征凱旋謂己未敢出師鄂漢也史稱忠濟以至元三十年卒碑立于至元二十二年稱公處遊嗣相踵行其事則忠濟已先卒矣碑末題魯國武惠公嗣孫沂州知州兼諸軍奧魯嚴度立石度蓋忠範之子仕至甘肅等處行中書省左丞諡貞憲

熱毀諸路僞道藏經碑 至元二十二年五月

右聖旨熱毀諸路僞道藏經之碑翰林院臣唐方揚文郁王構趙與票李謙閻復李濤李榮王磐等奉勅撰武德將軍泰安州知州兼諸軍奧魯粘合璋書丹元史世祖紀至元十八年十月己酉張易等言參校道經惟道德經係老子親著餘皆後人僞撰宜悉熱毀從之仍詔諭天下卽其事也佛老之行于中國久矣道經固多僞托佛書亦華人所譯往往竊取老莊之旨而其

徒常互相訾警人主又因一時之好尚而左右焉魏太武信冠
謙之而熱佛經元世祖崇帝師而熱道藏皆非卓然不惑于異
端者也釋祥邁撰至元辨僞錄侈陳其事意在排擯全真適足
供士君子之嗤噤爾詞臣奉勅撰文一篇祇一人任之此碑列
名者九人它碑未有其比云樞密院使兼領都功德使司事相
哥者卽朮哥也

重建至聖文宣王廟碑

大德五年

右重建至聖文宣王廟碑大德五年濟寧路總管按禮不華修
先聖廟旣成衍聖公孔治遣其子思誠奉表以聞勅中書賜田
五千畝供祭祀復戶二千八供灑掃之役而翰林學士承旨關
復承命爲文記之有云元貞改元先聖五十三代孫密州尹治
入朝聖書錫命中議大夫襲封衍聖公月俸百千秩視四品孔

氏世爵弗傳者久至是乃復按元史世祖至元十三年六月以孔子五十三世孫曲阜縣尹孔治兼權主祀事而元貞初襲封衍聖公史獨遺之何也史又載至元四年勅修曲阜宣聖廟以碑攷之至元丁卯所修僅奎文閣杏壇齋廳學舍而禮殿未及焉至是前殿後寢規制始備且有賜祭田復灑掃戶之勅豐碑大書迄今無恙視丁卯之役大小攸別矣乃作史者載彼而遺此則又何也

義州重修大奉國寺碑

大德七年九月

右大寧路義州重修大奉國寺碑盧慈撰王途書其云金紫光祿大夫兵馬都元帥王公者王珣也途字子溫卽珣之孫元史王珣傳作璉者字之誤也傳不云爲遼陽路總管略之也公主表普顏可里美思公主適唆都哥子寧昌郡王不憐吉歹不詳

公主所自出以此碑攷之知爲成宗之堂妹亦未審何人女也
諸王表稱不尔吉歹駙馬公主表作不憐吉歹音之訛也

梁國文正公何瑋碑

建祐四年

右河南江北等處行中書省平章政事贈太傅開府儀同三司
梁國文正公何瑋神道碑瑋字仲輅卒以至大三年年六十有
六祖淵官易州太守贈大司徒易國公諡武宣子德嚴順德路
總管德溫保定翼副萬戶皆史之所闕瑋父伯祥諡忠毅而史
作武昌者誤也碑文云建祐三年三月十五日大保曲出丞相
叔固集賢大學士顯言叔固者遙授丞相李邦寧之字顯則陳
顯也曲出李邦寧皆領集賢院大學士而不書舉其官尊者稱
之也遙授者非正授而以虛名寵之故宰相表不列邦寧之名
其字而不名者殆以先朝舊臣故優異之歟碑載瑋爲中丞時

地震上疏咎在大臣明日政府洪創舒木人刺沙阿老瓦丁皆罷此事當在大德八年紀傳俱失載洪創舒卽洪雙叔聲之轉也

大報國圓通寺記

延祐六年十月

右大報國圓通寺記寺在嘉定縣治東北不數十步元時沙門明了所建大德己亥春賜額圓通丁未冬武宗加賜今額明了號了堂俗姓高氏武宗賜號妙明圓悟佛心禪師仁宗加賜妙明圓悟普濟佛心大禪師城北大吉祥皇慶寺城東南大資福壽寧尼寺亦其所建也予少讀書城東數遊斯寺摩挲趙松雪碑輒移時不去元仁宗稱松雪旁通佛老之旨造詣元微讀記文信然書法圓勁則松雪本色也篆額者爲高麗國王王璋其署銜云推忠揆義協謀佐運功臣開府儀同三司太尉上柱國

駙馬都尉潘王攷璋以至大三年封潘王延祐二年請傳位于世子高詔授高開府儀同三司潘王碑立于延祐六年璋猶稱潘王者高雖受潘王之封而王印猶在璋所至泰定二年璋卒高乃襲爵受印元史諸王表云潘王王高泰定三年以駙馬襲封可見延祐之世璋爲潘王如故矣元史高麗傳失書璋封潘王事又誤作章皆踈舛之甚也

東平忠憲王安童碑

至治元年十一月

右中書右丞相東平忠憲王安童碑元史英宗紀至治元年十一月丙申勅立故丞相安童碑于保定新城卽此碑也蘇天爵嘗鈔其文入文類以石本校之異者百餘字石本刪去數十言文義更完碑卽元復初所書故後定之本勝于初稍文章之貴乎改削如此板本云碑建大都良鄉之迥遠石刻作新城者初

擬立石良鄉後乃定于新城也其地曰高碑店蓋以此碑得名
距涿州三十里實新城縣之西北境也碑久仆沒土人莫知其
處獨碑趺存高可隱人馬頃十餘年前直隸總督某欲立碑刻
己文有州判張某者自新城多舊石刻可取爲碑材卽遣訪之
無所得乃募人於碑趺旁培土徧求之得斯碑于一里外其陽
乃蒙古書衆莫識復役丁夫覆而視之額云大元勅賜開國元
勳命世大臣之碑碑文漫滅者僅十之一新城令單君功權拓
數本上督府言狀意不欲毀之也督府不識安童何人命工磨
去其文得碑材者四識者咸惋惜焉予友毛檢討式玉時在單
令所得拓本屬予題而藏之

嘉定州儒學教授題名記

一奉定二年七月
十四年四月

一至正

右嘉定州儒學教授題名記一爲金華劉德載撰題名自楊吳

中至吳靜觀凡二十人。一爲贛州朱孔昭。以題名自朱孔昭至蔣堂凡四人。以韓浚嘉定縣志官師表校之。微有異同。如楊翼中元貞二年七月任。而表以爲大德元年。貢松至大元年任。而表以爲四年。王枋至大四年任。而表以爲元年。蔡登龍亦至大四年任。而表以爲皇慶元年。林疇至治元年。權學事而表失其年。分護祿賜不花至元三年任。而表以爲至順三年。楊伋至元六年任。而表以爲元年。朱孔昭至正十一年任。而表以爲十四年。石渥至正十四年任。而表以爲十五年。蔣堂至正二十一年任。而表失其年。分表又誤列王枋于貢松前。林疇于陶元容前。俱當據碑改正。若學道書院山長王子昭卒于前。至元二十五年。直學潘剛中乃宋紹定間人。表俱列之大德初。則謬之甚也。

贈寧海州知州王慶墓表

嘉定五年十一月

右贈寧海州知州王慶墓表文云父生于擴慶庚申沒于至元
癸酉壽七十四妣生于擴慶丙辰沒于至元庚寅壽九十五按
丙辰宋慶元二年也庚申慶元六年也更慶元爲擴慶未詳其
故元時江浙行省有慶元路未嘗更其名何獨于宋之年號而
更之且又直呼宋寧宗之諱乎

太師太平王德勝廟碑

右太師太平王德勝廟碑元文宗朝宜興州官吏建以頌中書
右丞相燕鐵木兒之功乾隆二十一年秋予奉命至熱河訪
求事蹟聞小興州有是碑亟移書兵備道使吏人揭之吏不知
椎拓之法乃施墨于石以紙背就摹之遂模糊不可讀審諦良
久始得其大略書之云右丞相羅思太卿也志迷失與北將乃
馬歹等對敵之地大丞太卿將其軍以衝於前縣官等召募義

兵以繼其後于是捕撈斬首者不啻數千級克奔來降者奚啻數萬人若然者非倚其地利恃其人力尙其高詐而勝也以德而勝哉非奉天時致天討不能也初右丞太卿俱在上都知正統之有在不爲倒刺沙計謀之所誅南北構兵太卿有獲北使之勞有告內變之忠及會右丞與北軍戰于是而德勝也上嘉之進其高爵被其金帛御衣楮幣海青之重賜焉逮天下既定奉陞縣爲州縣官吏爲州官吏上遣使賜酒十樽以賚美焉攷元史文宗紀致和元年八月壬子阿速衛指揮使脫脫木兒帥其軍自上都來歸卽命守古北口乙卯脫脫木兒及上都諸王失剌平章政事乃馬台詹事欽察戰于宜興斬欽察于陣禽乃馬台送京師戮之絕不及斡羅思也忒迷失二人之力惟阿答赤傳稱斡羅思以天歷元年諭降上都軍陞隆鎮衛都指揮使

然亦不載其戰功其官右丞亦傳所失書也嗚呼天歷之君臣
乘國有大喪大都空虛挾其權謀詐力以奪人主之嫡嗣慮天
下議其後因誣晉邸以惡名而當時傾危阿附之徒作爲文詞
大書深刻謂奉天時以致天討然萬世公論具在其可欺乎元
史於泰定天歷之間多徇曲筆未明春秋之義也

齊國武敏公樂實碑

元統三年五月

右齊國武敏公樂實碑翰林侍講學士虞集撰文元史武宗紀
至大二年八月立尙書省以樂實爲平章政事三年二月樂實
爲尙書左丞相駙馬都尉封齊國公碑以八月爲十月二月爲
三月史所書者除授之日碑所紀者到官之日皆非誤也碑云
加開府儀同三司尙書左丞相行平章政事武宗之世名爵隆
而遙授之官衆此左丞相亦遙授非眞拜故宰相表祇列于平

章政事是其證也本紀不書行平章政事又不云遷授殆誤以爲真相矣元制諸王之女皆稱公主其俗卽稱駙馬樂實尙宗女者四曰唆台公主曰著思蠻公主曰完者台公主皆瑩仙帖木兒王之女曰朮赤罕公主忽都帖木兒王之女故有駙馬都尉之授也瑩仙帖木兒據碑爲移相哥王之子而元史宗室世系表不列其名以是知表之所失載者多矣此文道園學古錄與類稿俱無之然立言有體其出伯生之手無疑學古錄出于門人編輯故李本有泰山一毫芒之歎若此碑者洵可補文集之闕也

孫德彧道行碑

元統三年九月

右孫公道行碑鄧文原撰文趙孟頫書德彧沒于至治元年文稱今上者謂英宗也松雪於至治二年六月卒碑末云元統三

年歲舍乙亥九月吉日建蓋二公撰書之後又十餘年而始勒之石碑末所題年月及完顏德明題名皆後人續書非松雪筆也篆額者爲趙世延其署銜云前中書平章政事翰林學士承旨知制誥兼修國史奎章閣大學士魯國公此天歷以後世延所歷之官松雪未及見也亦後人追書

重修曲阜宣聖廟碑

至元五年十一月

右重修曲阜宣聖廟碑歐陽原功撰文巉巉書元史順帝紀至元五年勅賜曲阜宣聖廟碑卽此文以集本校之微有異同集本云御史大夫臣別里怯不花臣脫脫御史中丞臣達識鐵穆兒臣約治書侍御史臣鏞等奏監察御史言石本但云御史大夫臣別里怯不花臣脫脫等言集本文宗皇帝在御奎章閣學士院臣奏石本則書院臣沙臘班名集本勅翰林學士院學士

臣原功爲文石本作翰林侍講學士蓋詞臣屬藁進御後容有更定而原功自署銜當以石本爲正也文云凡有國百餘年以來繕修宣聖廟再丁酉之初以開同文之運天歷之際以彰承平之風按開復文宣王廟碑云闕里祠宇燬于金季之亂右轄嚴公忠濟保魯嘗假清臺頒歷錢佐營繕之費歲戊申始復鄆國後寢以寓先聖顏孟十哲像彼云戊申而此云丁酉者蓋經始于丁酉落成于戊申也元史禮志及嚴實傳俱不載未免失之漏矣

重建李晉王影堂碑

至正十五年

右代州柏林寺李晉王影堂碑元至正十五年立文稱王之遠孫阿剌忽思剔吉忽里攷閱譜牒知主爲遠祖然則趙國之先出自沙陀李氏矣元史列傳述趙國世系自末安以後俱闕如

讀之輒生文獻無徵之憾據諸王表趙王馬札罕以泰定元年
封此碑云至元乙亥趙王馬札罕釣旨則重紀至元之際馬札
罕尙無恙而文宗紀又有趙王不魯納意者馬札罕與不魯納
卽一人歟抑或馬札罕已廢而復立歟皆無明文以知之也碑
又云今趙王八都帖木兒則至正中嗣立者諸王表及本紀俱
不載

潛研堂金石文跋尾卷第六